Lorenzo Cebollero Ciprés

# AS COSAS D'OS TIEMPOS D'ANTES MÁS EN ARGUIS Y A REDOLADA



PUBLICAZIONS D'O CONSELLO D'A FABLA ARAGONESA

2.2

## Lorenzo Cebollero Ciprés

## As cosas d'os tiempos d'antes más en Arguis y a redolada



Uesca

PUBLICAZIONS D'O CONSELLO D'A FABLA ARAGONESA

#### SERIE CHENERAL EN ARAGONÉS PUBLICAZIÓN LUMERO 63 TESTOS POPULARS

- C Lorenzo Cebollero Ciprés, 1998
- O Publicazions d'o Consello d'a Fabla Aragonesa, Uesca, 1998

Edita: PUBLICAZIONS D'O CONSELLO D'A FABLA ARAGONESA

Trestallo postal 147, 22080 UESCA.

Telefono y facs: 974-224716.

Lumero Rechistro d'Interpresas Editorials: 2.381/81.

Lumero d'agremiato a lo I.N.L.E.: 72.665.

Imprentato en: IMPRENTA LA ENCARNACIÓN, S. L.

C / Algáscar, sin lum. (Zona Industrial)

Telefono y facs: 974-211480

22004 UESCA

Fotografías d'a portalada y d'as fuellas interiors: Fernando Pérez Malo.

I.S.B.N.: 84-86036-70-4

Deposito Legal: Hu-449-1998

1ª edizión: 1.000 exemplars

Uesca, 1998

#### Introduzión

Boi a escribir iste libro con a fabla d'Aragón; yo sé que a muitos les gusta y aprobecho a ocasión.

Dedicau pa a tierra baxa y o terreno montañés; antes cuasi daba pena agora ye todo a o rebés.

No cogébanos en as calles con os machos y o ganau; agora pasamos con autos anque seiga de cruzau.

Aquellas calles d'os lugars, en ibierno una barduquera y tamién llenas de piedras seguntes qué terreno yera.

Agora as calles son majismas, las han feito de zemento; o que ha bisto aquello d'antes yo creigo que está contento.

En os lugars teneban eras, en cada era un pallar; s'han combertiu en chardins y en chalés pa beraniar. Hai casas en os lugars les han dau güaltapelera; ande está a telebisión antes yera a pesebrera.

Ande comeban os machos y otras clases de ganau, agora comen as presonas, no digaz que no ha cambiau.

As calles llenas de críos, alguno meyo desnudo; pero agora en estos tiempos críos no'n beirás denguno.

Gallinas, perros y gatos a bezes tamién tozinos, iban solos por a calle y comiendo por os caminos.

Aquel ambiente d'os lugars aquella unión qu'en abeba, ya no esiste oi en día toda a confianza aquella.

As bezinas se preguntaban: ¿Qué bas a fer pa zenar? Aún no lo sé, Sebastiana, he puesto agua a calentar.

Tendré que pelar patatas pa llenar bien o puchero; luego las feré desfeitas y las adobaré con sebo. O corazón me lo dicta o que tiengo que dezir; asinas, sin otro misterio, yo ya he empezau a escribir.

Primero charraré d'o d'antes, de cómo a chen ha penau, pa que lo leiga y se fije todo o que no lo ha pasau.

Cómo bibimos agora tamién les contaré algo, porque emos corrido más que a carrera d'un galgo.

### Normas y costumbres de treballar antiguamente

De a probinzia de Uesca y de más lejos tamién boi a charrar d'ixos tiempos que no lo pasoron bien.

Boi a charrar d'ixas trazas que lo feban asina de mal como en o lugar mío, que d'Arguis soi natural.

Tampoco ye que charrasen mal, yera a forma que teneban de pronunziar y llamar os trastes que de pequeños aprendeban.

Teneban una costumbre unos y otros lugars de llamar d'otra manera os trastes que yeran iguals.

O que por Uesca llaman dalla por Broto llaman o dallo, otros llaman calderizo o que por L'Aínsa dizen cremallo. O que llaman escarzeles por a bal de Caldearenas, pasan ta Bentué y ta Arguis y lo llaman algaderas.

Cuando limpian os árbols ixo lo llaman podar, yo conozco otros sitios tamién le dizen bribar.

Unos lo llaman el hijo otros le dizen o fillo, y o que muitos llaman rastro pa algunos ye o restillo.

Tamién o ganau de lana lo llaman de dos maneras, unos dizen as obellas pero otros dizen as güellas.

De todas estas maneras de charrar y treballar les boi a contar a todos o que pueda recordar.

As raízes d'os lugars o que quiero recordar porque estas cosas d'antes no se deben olbidar.

Ista ye a bida, siñors, que feban en os lugars, todos yéranos felizes sin tantas comodidás. Antonzes no abeba diners pero o personal bibiba con o qu'ellos se criaban porque otra cosa no esistiba.

A os que llamaban ricos no yera por os millons, yera por mellors campos y a casa con balcons.

Teneban todo a o rebés: a os que llamaban pobretons, pocos bichos, pocos campos poca casa y sin balcons.

Asina que n'abeba de to, como gosa suzeder, todos s'iban aduyando y asina podeban comer.

Os que son un poco biellos me ban dando a razón de o qu'emos prosperau que ye una esagerazión.

Cuando se feba de día saliban d'a abitazión y cada uno de casa sabeba a obligazión.

A que primero enganchaba a criada u a dueña pa enzender o fogar, dimpués de subir a leña. L'ombre no estaba parau: mientras a muller treballa se da güelta por os bichos y ha marchau a buscar palla.

Se lebantaban os críos los atendeba l'agüela, que les daba o desayuno y los mandaba t'a escuela.

O desayuno que les daban tampoco yera masiau: chodías cozidas d'ayer que las eban calentau.

Chulla u sardina con caldo tamién les gosaban dar y o que más fijo yera sopas d'ajo p'almorzar.

Si eban muerto o tozino, torteta frita en a sartén; como tenébanos fambre siempre se comeba bien.

Si bel crío protestaba u deziba que no le gustaba, marchaba más espabilau y pa comer le'n guardaban.

Os pobres teneban fillos y con un gran porbenir: a os diez u doze años los mandaban a serbir. Si yera cría, de ninera; y de chulo, si yera crío; a treballar todo'l día, fese calor u frío.

O salario que les daban tampoco yera demasiau, comeban mellor que en casa y saliban bien foguiaus.

Cuan o zagal se marchaba su madre siempre sofriba, y l'ombre le contestaba: qué imos a fer, María.

Aún nos quedan otros fillos que nos ferán compañía, y iste, como ye más grande, ya se ganará a bida.

Su padre los iba a bier, que nunca los olbidaba, y a l'otro día golbeba con as cosas que le daban.

Bel pan d'aquellos grandes, bel cantaro de bino y a lo mellor patatas, todo por cuenta d'o fillo.

A muller le preguntaba: qué tal l'has alcontrau; y l'ombre le contestaba: ha creziu y s'ha engordau. Asta qu'iban ta la mili a treballar y a callar; pero luego, al lizenziar-se, se poneban en su lugar.

Bel padre les deziba, ya dimpués de lizenziau: mañana a treballar que ya te tiengo afirmau.

Sabe qué le digo, padre, que he cambiau de pensar, picaré ande yo quiera y pa yo será o chornal.

Dende os treze a os bente años son siete os qu'han pasau; años que aprendeban muito y sin aber estudiau.

Pa abitazión a cuadra pa lababo a fuen y aprendeban lizions con as trastadas d'a chen.

Mientras estaban de chulos ye cuando lo pasaban peor luego aprendeban y aszendeban asta ser mozo mayor.

Chulo ye o que iba a serbir, pinche o que iba de chornal y aprendiz u botones o que iba t'a capital. Abeba otro aprendizaje que tamién s'ha terminau: lo llamaban repatán a o que iba t'o ganau.

Boi a nombrar as mesachas, guapas como as d'agora, pero treballaban más con o esparto y con a escoba.

Algunas saliban de casa sin saber aún o qué yerán pero a os bente años hai qué bier o que sabeban.

Una piedra pa arena, un benzello pa esparto; limpiaban bien a bajilla, as cadieras y os bancos.

Agora pasan a fregona y ya está todo arreglau; antes iban de rodillas y o pozal de l'agua a lau.

Bellas bezes llebaban o delantal enta atrás; o que no sepa porqué que pregunte y s'enterará.

Serbiban en casa de labrador u pa siñors de Uesca, teneban muito treballo y pocos días de fiesta. Cuando saliban de casa a bailar u pasear lo dexaban todo limpio y siempre dimpûés de fregar.

As mullers que ya tienen os zincuenta años pasaus que les pregunten a ellas cómo y cuánto han treballau.

Si as criadas teneban asuntos que resolber siempre estaba o señorito dispuesto a corresponder.

Aquellas mullers d'antes han dau mui güen resultau todas se fueron casando y denguna s'ha esburziau.

Istos ombres y mullers tenendo pocos estudios tienen piso, han criau fillos sin aduyar-les denguno.

Les enseñoron mui poco pero aprendioron a tira, a nezesidá enseña anque les paizca mentira.

Aduyemos a os padres, emos criau a familia y agora que bienen os nietos a cudiar-los muitos días. As mozas no iban t'o bar y fumarros muito menos, as unicas que fumaban, ixo todos lo sabemos.

Ista ye a bida d'antes de os que iban a serbir; de os que quedaban en casa algo les boi a dezir.

Con toda su güena fe y estudiando poco u nada bebiban en os lugars con o qu'ellos se criaban.

Abeba yerbas utiles, qu'estas ni las sembraban, se criaban ellas solas pero las aprobechaban.

O malbabisco y o estremonzillo con o laurel y o oregano lo empleaban p'o mondongo y compraban anís en grano.

A yerba de mermar sangre a ruda, a tila y té de roca, ixa yera a farmazia que abeba en aquella epoca.

Tamién cogeban sabuco que lo guardaban en casa colgau d'un año ta otro en os maderos d'a falsa. Sacaban perras d'os montes, se cobraba d'o ganau, se treballaban os campos y denguno estaba parau.

No teneban carretera y menos agua corrién; tampoco luz eleutrica y asina bibiba a chen.

S'alumbraban con candils de calburo, d'azeite y belas y tamién con unas estillas de pino que llamaban tiedas.

Pos fija-te, o telefono, ixo ni lo conozeban; o que teneban que fer cuando alguno fallezeba.

A os parientes d'o muerto les teneban qu'abisar fese o tiempo que fese os bezinos d'o lugar.

Pa dar a mala notizia teneban qu'ir andando dos, tres, cuatro u zinco oras anque estase nebando.

Muitos días en o ibierno no paraba de nebar, se quedaban incomunicaus y se teneban qu'arreglar.



L'autor escribindo baxo una nuquera. Dezaga, os mons.

O pan se lo feban ellos, o demás se lo criaban: os güegos d'as gallinas y o tozino que mataban.

Toda a familia de casa en o berano recogeban pa comer en o ibierno; otra cosa no teneban.

Con a lana d'as obellas se feban pa bestir, calzetins y otras cosas y colchons pa dormir.

Cuando abeba muita niebe a dengún bicho soltaban, comeban con yerba en casa y grano que les guardaban.

Si se'n iba un poco a niebe ya soltaban o ganau, antonzes zerca de casa, t'o solano u t'o zerrau.

O calzero que llebaban cuando iban t'o ganau, siempre yera un par d'abarcas y to'l día os pies mojaus.

En o que llaman solano a niebe se fundiba por ser terreno pendiente y carasol a mediodía. Le deziban o zerrau a una estensión de terreno, todo rodiau de paré y lo guardaban po l'ibierno.

Si comeba aquel ganau y le poneban esmero, todas criaban mui bien y se sacaba dinero.

Si o cordero pasaba fambre se conozeba deseguida, teneban a coda curta y a tripa mui salida.

Con bier aquellos animals ya se conozeba a l'amo, y tamién se comprendeba si comeban palla u grano.

Cuando a lana iba barata gosaban aprobechar: fer colchón pa bella filla si se quereba casar.

Pa fer un colchón entero as obellas qu'empleaban, yera por o menos bente, pero si no se pelaban.

Si en o monte abeba aliagas u pasaban nezesidá as obellas se pelaban y aquel año a'spabilar. Por medio de as obellas siempre estaban os padres, que se llamaban mardanos por si alguno no lo sabe.

Un mardano enzima a obella se llamaba marezer, y les alcorzaban a coda pa que lo podesen fer.

O día de Chuebes Santo yera o día d'escodar, un poco por a mañana siempre antes de soltar.

De as codas d'as corderas ya s'encargaba l'agüela, d'esquirar-las y sucarrar-las y echar-las n'a cazuela.

Cuando criaba a obella al ser añisca o primala, ye que teneba dos años si se quedaba preñada.

Ya estoi con estos bichos que ye o ganau de lana, l'animal más sufrido, de cosa nunca se quexaba.

Las ataban con un benzello o día d'esquirar, y chitadas en o suelo se teneban qu'aguantar. Si les pizcaban con as tixeras abeba una soluzión, yera echar-les en a herida un pizcacho de carbón.

A que estaba atada cuando iban a almorzar, allí se quedaba sola y a obella sin chistar.

Cuando la iban a matar por no criar u por biella, ni belaba ni chilaba; siempre callada a obella.

Abeba animales d'estos, no sé aquello por qué yera, no quereban o cordero y se ataba en a pedera.

A pedera yera una estaca; no se gosaban soltar, asta que amaban o cordero y le daban de tetar.

Cuando belaba a obella cuasi siempre gosa ser, porque llaman o cordero u porque quiere comer.

As obellas son agudas aun siendo tan silenziosas, cuando hai setas por o monte conozen as berenosas.



 $O\ pastor\ y\ as\ obellas.$ 

Si pariba bente obellas n'un rabaño de ganau, conozen a o cordero, denguna recoge o d'al lau.

Agora que charro d'o ganau tamién tiengo que dezir, que se formaba o rezago allá por o mes de abril.

Que si una craba por biella, una obella que no andaba, un cordero entriparrau buen rabaño se formaba.

Le llamaban o rezago os animales lacraus, que no se moriban en ibierno pero saliban apuraus.

En o mes de chulio u agosto o rezago ya no estaba, a que no s'eba muerto pa comer se la mataban.

Emos charrau d'as obellas, agora d'os tozinos ba a ser, tamién en criaban en casa pa bender-los y pa comer.

Cuando criaba a tozina siempre sacaban dinero, anque o prezio tamién yera un pocacho abenturero. Sobre seis u ocho tozinos os que criaba a madre, pero si comeba bien por a mañana y a tarde.

Siempre se limpiaba a zolle cada tres u cuatro días, en un lau s'echaba a palla y en un bazión a comida.

D'un madero un poco gordo les feban un bazión, que comeban os tozinos chuntos y a limpio empentón.

A tozina se chitaba pa dar-les bien de tetar, cada uno cogeba su teta, no la gosaban cambiar.

A pesar de ser tozinos se sabeban arreglar, siempre dormiban n'un sitio y ta otro iban a pichar.

Unas tres semanas tetando cuatro tetar y comer, total a las siete chustas los llebaban a bender.

En un caxón dentro o carro ande abeba carretera, pero si yera camino con o macho y as algaderas. N'as algaderas d'o macho os tozinos los poneban, l'ombre tirando d'o ramal y marcha con a mercanzía.

Cuando marchaba de casa que siempre yera antes de día, a muller preocupada al despedir-se le deziba:

Ya te fijarás, Silbestre, y bes bien espabilau, que os tozinos son majos, con o qu'a yo m'han costau.

L'ombre baleba muito n'aquellos tiempos d'atrás, y si digo a berdá a muller en baleba más.

Sí que bendeban tozinos pero siempre se'n guardaban, pa criar y pa engordar-los, que en o ibierno los mataban.

Pa criar bien o tozino cuasi un año les costaba, con comida natural, compuesto nunca le daban.

Os zagueros días de bida pa que estase bien mazizo, le alargaban a razión con billotas u panizo. Ixe tozino tan blanco que no lo quiere denguno, pues yera mui güeno igual frito como crudo.

Con torteta pa almorzar y pa comer con chodigas, no abeba colesterol aun comiendo tos os días.

Ya que charro d'o tozino con todo isto que les pongo, boi a contar-les un poco l'asunto d'o mondongo.

Mondonguiar yera un treballo que teneba por destino, manejar os ingredientes d'a matanza d'o tozino.

Os parientes y bezinos se soleban achuntar, un día mui de mañanas pa matar a l'animal.

Antes no abeba adelantos y te tenebas que enfrentar, cara a cara con o bicho, que se feba respetar.

Dimpués de luchar un rato y zeprenar de cojón, a perder siempre o tozino que s'echaba n'o bazión. As mullers mui balientes a choben como l'agüela, pa regolber a sangre baxaban con a cazuela.

Cuando ya s'eba muerto y no se sentiba chilar, bel crío d'os pequeños se gosaba presentar.

Pa comida d'os tozinos les diré o que les daban, cosas criadas en casa y que tamién las guardaban.

As patatas más menudas y os pelaus d'as que comeban, los echaban n'o caldero y pa os tozinos baleban.

Echaban remolacha y cols y os cascos d'as chodigas, tamién pulpa y abozos que los cozeban tos os días.

Cuando o caldero yera colgau n'o calderizo u cremallo, aún echaban por enzima hoja de peperigallo.

Ista hoja la echaban cuando empezaba a bullir, pa que se chupise l'agua y no se'n ise a salir. Todo isto lo cozeban dimpués d'aber-lo labau y pa apaño les echaban un pocacho de salbau.

Luego pa sacar o caldero dimpués de coziu y preparau, se necesitaba dos personas pero d'o brazo remangau.

Chafaban toda a comida, la meteban en o pozal y les ne baxaban a os tozinos que ya roñaban por o corral.

Como yera tan de mañanas o crío cuasi dormiba, s'azercaba ta su padre y medio espantau le deziba:

"Cuando saques a bichiga que me la guarde l'agüela, nos feremos un balón cuando yo salga d'a escuela".

As piczas que se sacaba d'aquel cochino colgau, yeran más que as d'un auto cuando está ya desarmau.

Luego almuerzo que feban as güenas mullers aquellas; pa saber bien cómo yera, ixo tastar-lo caleba. Dimpués de labar a tripa y limpiar os estentinos, as mullers en a cozina feban os embutidos.

Sangre con roz y farina se masaba con esmero, pa tortetas y morzillas y cozer-las n'o caldero.

O lomo con as costillas o más güeno y o más sano, lo guardaban en conserba pa o tiempo de berano.

D'aquellos tozinos d'antes todo se aprobechaba, estubiemos unos tiempos que asta o pelo lo compraban.

Sólo me queda dezir qué feban con os jamones, colgar-los un poco altos pa comer en ocasiones.

Agora boi con otra istoria que tamién quiero contar-les, ye o romanze de a lueca por si alguno no lo sabe.

La llamaban a lueca por a manera de charrar, pero o nombre berdadero yera clueca y nada más. A lueca yera una gallina que se dexaba de poner, iba con as alas anchas y se dexaba cojer.

Al bier asina a gallina andando por o corral, le buscaban unos güegos y la meteban a cobar.

Pa que os güegos balesen y dasen güen resultau, teneba qu'aber un gallo con as gallinas mezclau.

Catorze u quinze güegos con palla n'un caxón, d'enzima meteban a gallina y a empezar a obligazión.

Dar-les calor a os guegos yera un treballo anormal, por ixo a o bicho le daban una comida espezial.

Se les daba pan con bino y pastura tos os días, pa que con ista comida tenesen más calorías.

A gallina se meteba mala y con mal color, y tamién puedo dezir-les que echaba mui mala olor. Estaban bentiún días de a comida t'o caxón, y d'o caxón ta comida siempre a misma funzión.

Tamién tiengo que dezir que a gallina estaba atada, d'una pata con una cuerda pa que no s'escapara.

Cuando saliban os pollos en dos u tres días no comeban entre a lueca y o fuego a calor los manteneba.

Siempre fallaba bel güego, se quedaba todo puerco, y antonzes a muller deziba: en ha salido uno batueco.

Ya todos os pollos chuntos los sacaban ent'a calle, donde les tocase o sol y no les pegase l'aire.

Os pollos aún peligraban ixa ye a pena que abeba, porque acudiba bel cuerbo que baxaba y los cogeba.

Todo isto se feba antes sólo pa poder comer, cuatro pollos cada año y doze güegos al mes. Agora boi con otro tema, no ye treballo de muller, ye treballo sólo d'ombres porque ye mui duro de fer.

Iste treballo tan malo que n'o ibierno lo feban, yera cortar n'os pinares os maderos que baleban.

No teneban maquinaria: pa cortar bel madero, los cortaban con estrals que las feba o ferrero.

Isto se feba entre dos o cortar-lo y o pelar-lo, normalmente os chóbens, os biellos ya ni pensar-lo.

Dimpués d'estar preparau lo teneban que sacar, yeran os ombres y os machos a puro de zeprenar.

Abeba machos mui güenos una bez que s'enganchaban, los soltaban por o bosque y ellos solos lo sacaban.

Anque fese muito frío n'o pinar no s'estaba mal, teneban güena comida y muita leña pa quemar. Aquellas chens de dinantes muitos días de su bida, los pasaban por o monte pero inzendios no se produziban.

Aún boi a dezir-tos más: o monte lo sucarraban, os alizons y as aliagas, pero árbols nunca quemaban.

Como o monte estaba limpio o fuego no podeba correr, llegaba ta un sitio raso y ya dexaba d'arder.

Picaban pinos con idea y con cudiau los tiraban, pa no romper muita planta que pa otro año se criaba.

O qu'ha iu por a montaña, por ejemplo a Guarguera, s'acordará que en os cantos siempre abeba madera.

N'aquellos tiempos d'antes a madera yera o primero, no abeba biegas de zemento y tampoco meteban fierro.

Sólo meteban madera cuando feban os tellaus, pa puertas y pa bentanas y suelos entarimaus. Otro apoyo yeran as bacas yeguas y burras de cría, o que podeba cada uno que con ixo se bibiba.

Cuando estos bichos teneban zerca a ora de parir, se lebantaban a bier-los de noches con o candil.

Cuando o parto no iba bien, ixe yera otro calbario, apareja o macho y marcha a por o beterinario.

Sicmpre abeba en os lugars bel ombre afizionau, pero que l'albéitar lo teneban contratau.

O beterinario y o medico yeran apaizius os dos, si llegaban a punto grazias, y, si no, alabau sía dios!

A o beterinario lo llamaban l'albéitar u mariscal, y al bier-lo benir deziban ya s'azerca, menos mal.

Tamién a o siñor medico zirujano lo llamaban, y yera bien rezibido cuando lo nezesitaban. Antes d'empezar o treballo siempre se gosaban labar, porque aquel treballo no yera ni fer leña ni labrar.

Al llegar istos siñors les teneban preparada, una palangana con agua en una silla esculada.

Os que yeran un poco ricos teneban palanganero, que beniba a ser o mismo un forato y cuatro fierros.

A estos ombres que les digo los teneban abonaus, cobraban una bez a l'año tampoco sería demasiau.

Pagar muito no podeban pero siempre s'acordaban, cuando mataban o tozino y también cuando masaban.

Cada tres u cuatro pueblos abeba bel ofizial, lo pasaban como todos entre regular, bien u mal.

Entre ellos o ferrero o que más teneba que madrugar, yera pa ferrar os machos u nazerar u aluziar. Aluziar ye fer punta a una rella pa labrar, y cuando se feba chiqueta abeba que nazerar.

Ixo de nazerar a rella yera empalmar un piazo, cuando estaba bien rusiente con placa y limpio mallazo.

Cuando nebaba tantismo iban os ombres t'a ferrería, unos yera pa treballar y otros a esbastar o día.

Tamién feba o ferrero treballos a su manera, como alguazas p'as puertas zerrollos y gorruneras.

Luego feba as ferraduras y claus pa encañizar, claus pa adornar as puertas y bella bez remendar.

O carbón que empleaban n'a fragua pa treballar, algunos se lo feban ellos y s'escusaban de comprar.

Ixo sí llebaba miga, preparar una cabera, que no se combertise en brasa ni se quedase en madera... Fendo forma de cono a leña en un montón, y la enronaban con tierra dexando-le respirazión.

Cuándo estaba o carbón por o fumo lo sabeban, crosidando día y noche por o color que se feba.

Gosaba aber otro ombre lo llamaban o zestero, feba zestas y canastas capazos y roscaderos.

Pa poder cargar o fiemo tamién feba algaderas, pa llebar tozinos y cantaros de dos u de tres maneras.

Pa fer estos treballos o que teneban que emplear, yera charga, caña y brimbes pero dimpués de remollar.

Tamién feban espuertas que se teneban qu'emplear, unas pa tender o fiemo y otras pa espedregar.

Boi a nombrar os sastres que saliban istos tamién por as casas d'os lugars y asina les iba bien. Trajes güenos no'n feban pero sabeban treballar, con bella prenda suelta os colchones y apiazar.

Unos lo llamaban o sastre otros pelaire le deziban, se les importaba igual porqu'ellos iban a lo qu'iban.

Iste ofizio de sastre peón no nezesitaba, y almorzaban ellos solos bes a saber qué les daban.

Cuando treballaba o sastre siempre yera dentro de casa, si feba calor n'a sombra y si no, o brasero con brasa.

Con o pelaire y a dueña siempre ha abiu bel romanze pero tamién ocurriban entre a criada y o sastre.

Agora boi con os basteros: yera un ofizio mui majo, istos feban os bastes pa os machos de treballo.

Treballaban en o patio y con bino en o porrón, igual que o pelaire qu'estaba en a abitazión.



Picando a dalla pa estirar o azero y que corte más.

Si feban un baste nuebo o que teneban qu'emplear, una piel y muita lana y tamién palla espezial.

Meteban muitisma lana y palla de zenteno esgranada, dimpués tela de cañimo, luego una piel bien sobada.

Pa dar-le cuerpo y armau tamién meteban maderas que se llamaban sillares, tablillas y garroteras.

Cuando estaba enzima d'o macho pa poder-lo sujetar, antonzes le meteban a zincha con a tarria y o petral.

Luego pa amoldar o baste cargar leña u cargar piedras, abeba que tener idea en o poner as algaderas.

Con os bastes rezién feitos y os machos bien cudiaus, bentaja pa alcontrar nobia siendo un poco espabilau.

Tamién feba o bastero collerons pa trillar, y as colleras d'o chugo qu'empleaban pa labrar. Estaban os albañils que los llamaban piqueros, pa fer cubiertos y casas con as piedras y os maderos.

Tierra que llamaban buro empleaban pa zemento, y as paredes bien gordas nunca entraba frío dentro.


Pa fabricar o tellau dimpués de a paré feita, se meteban os maderos y o que llamaban recha.

Masaban buro con palla que meteban denzima a recha, con losas rancadas d'o monte y al final a casa feita.

Escribir-lo cuesta poco, leyer-lo poco tamién, o que no conozca estas casas las teneba qu'ir a bier.

Antes no teneban plumas ni tampoco montacargas, lo feban todo con os brazos por as güenas u as malas.

Cuánto tiempo tardarían en tener a casa terminada, todo rebuscau d'o monte o material qu'empleaban.



 $O\ zerrollo\ d'a\ puerta\ de\ o\ corral.$ 

Por os baxos d'a casa en algunas, arcos feban p'aguantar mellor o peso que por arriba meteban.

En bellas cozinas y cuartos pa suelo meteban losas, ya teneban que ser ricos pa poder meter baldosas.

Aún se puede bier una casa que tiene pa fregadero, dos pozas en una piedra feitas con mazeta y puntero.

Dimpués de rematar a casa pa que no quedase mal, rebocaban as paredes y lo feban con cal.

Tamién feban de cheso o suelo d'as abitazions, que se quedaba bien fuerte pa muitas chenerazions.

Dende fa treszientos años hai casas en bel lugar, y en estos tiempos d'agora aún está o suelo igual.

Pa tener calor y tener cheso o que esta chen feba, buscar piedras aparentes y en un forno las cozeban. O forno lo feban ellos fabricando-se un forato, onde meteban a leña pero sin parar un rato.

A puro quemar aliagas estas piedras las cozeban, las sacaban poco a poco y con mallos las moleban.

Con todo este material qu'a naturaleza nos ha dau, se feban casas mui fuertes qu'asta agora nos han durau.

Dende fa dos u tres siglos muitas casas han durau, a la fin ha siu a madera que por o peso ha fallau.

Sí qu'han fallau por o peso y por bella gotera, porque si esta no se quita se lleba a casa entera.

Feban mellor comida cuando os piqueros llegaban, cada uno seguntes podeba a familia s'esmeraba.

Cuando os albañils beniban se mataban una obella, porque asinas comeban carne, y a por bino si no'n eba. N'o terreno d'a montaña o bino no se criaba, por ser terreno mui frío a uga no se maduraba.

Una bez a l'año algunos lo saliban a comprar, con machos u con o carro, ixe yera pa encubar.

Sin embargo en eba otros que yera masiau conzieto, a beber agua s'ha dicho, esto sí que ye bien zierto.

Tamién abeba ocasions que toz iban a por bino pa fiesta mayor, pa siega y pa a matazía d'o tozino.

O bino cuasi yera lujo como acabo de dezir, abeba otras cosas antes que no se podeba preszindir.

Tamién abeba sogueros, ya me quedan pocos más, cuando estos treballaban iban andando t'atrás.

Os sogueros yeran ombres que feban sogas y ramals, pos ixo yera impreszindible pa tratar con animals. Abeba unos personajes que algo les boi a dezir, os pobres que iban pidindo porque quereban bibir.

Estos iban por os lugars y andando por o camino, pidindo de casa en casa patatas, pan u tozino.

Normalmente yera patatas o que les soleban dar, luego ellos se las bendeban pa beber y pa fumar.

Les deziban siempre os pobres pero de tontos ni hablar, preferiban bibir asina antes qu'ir a treballar.

En llegar en un lugar iban ta casa l'alcalde, y éste le deziba a l'alguazil: «mia qu'hai un pobre esta tarde».

L'alguazil ya lo sabeba y lo teneba que llebar, donde le tocaba o turno ta una casa d'o lugar.

N'a casa que le tocaba sí le daban de zenar, pero dimpués pa dormir ent'a cuadra u t'o pallar. Siempre iban mal afaitaus, a ropa medio pudrida, pero o más malo yera que llebaban compañía.

A compañía que llebaban yo no lo quiero dezir, y si alguno no lo sabe pues qu'empieze a discurrir.

Luego estaban os chitanos que se soleban presentar, tamién a esplotar o labrador que solo feba que picar.

Uno que yera estañador otro que yera paragüero, otros arreglar chergons y alguno alambrar pucheros.

Cuasi siempre dexaban rastro por ande eban iu, porque s'alcontraban cosas antes d'aber-las perdiu.

Algunos tamién llegaban tocando un trompetón, deziban que yeran comediantes, estos teneban razón.

Canasticos y zestotas os chitanos fabricaban, luego iban por as casas y o que podeban sacaban. Güegos, patatas u chulla tozino ranzio y chodigas, algo teneban que sacar pa comer aquellos días.

Abeba dueñas en as casas que as pezetas ni las tocaban, y si llegaban os chitanos comida ye o que les daban.

Si se moriba bel bicho sin saber o qué teneba, y llegaban os chitanos ellos bien se lo comeban.

Yo m'alcuerdo d'un caso aber un tozino enterrau, dar-sen cuenta os chitanos y han iu y se l'han sacau.

Tamién abeba un chitano que se llamaba Mariano, cuando mellor comeba carne se llebaba bel gusano.

O que tampoco fallaba nos bisitaba tarde en cuando, yera o esmolanchín siempre llegaba chuflando.

Se presentaba en os lugars por camino u carretera, empuchando un carruchón que sólo llebaba una rueda. Que soi o esmolanchín, dimpués de chuflar gritaba, y as mullers de casa bella cosa le bachaban.

M'esmolará estas estixeras porque son as de coser, y en bez de cortar a ropa sólo fan que remorder.

Pos tiene muita razón porque no está mica bien, mire si tiene otra cosa, que le'n esmolaré tamién.

Pos agora boi a baxar-le as d'esquirar o ganau, porque este ombre churaba esquirando l'año pasau.

A lo mellor tamién les daban un poco de pan y tozino, yera como una limosna pa comer por o camino.

Agua de muitos barrancos teneban siempre pa beber, y tampoco yera buena bida como ustedes pueden bier.

Otras familias bibiban treballando con os burros, les llamaban os burreros en aquellos tiempos tan duros.



Metendo o gancho en a soga a trabés d'una inxeridura.

Estaban aún antonzes sin esplotar as canteras, y carriaban con os burros a piedra pa carreteras.

Llebaban diez u más burros, toz mui bien enseñaus, siempre andaban en fila como si fueran formaus.

Tamién carriaban leña y si se terziaba carbón, todo llegaba t'as capitals pa guisar y calefazión.

Os que cortaban a leña y os que feban o carbón, se quedaban en o monte bibindo en un casetón.

Con ramas, cantals y tasca se feban una caseta, y astí asta que deziban pro, que buen treballo les cuesta.

En o fondo esto yera majo anque les paizca mentira, siempre en a naturaleza; de fambre denguno se moriba.

De as cosas que nos da o monte pocas balen oi en día, pero en aquellos tiempos con ixo muitos bibiban. Tampoco hai guarnizioneros estos yeran unos maestros, qu'arreglaban as colleras cabezanas y cabestros.

Luego estaba o texidor tamién n'aquellas epocas, le llebaban filo de cañimo y lo combertiba en trocas.

A o que llamaban trocas yeran unos piazos de telas, poco más u menos grandes que luego feban talegas.

Talegas pa llebar trigo, tamién pa carriar patatas, feban camisas y sabanas y tamién bellas mantas.

O cañimo pa estas prendas lo criaban en o güerto, pa combertir-lo en filo tampoco yera dengún cuento.

Con maquinaria de casa qu'ellos mismos fabricaban, combertiban a planta en filo otra cosa no empleaban.

Dimpués de criar o cañimo lo teneban que rancar, luego meter-lo a remojo pa poder-lo treballar. Entre otras ferramientas estaba a cascadera, tamién abeba un restillo y luego a debanadera.

Teneban tamién a rueca o fuso y o torzedor, asta que feban chubillos pa llebar-los ta o texidor.

Tamién abeba carpinteros en uno que otro lugar, que cuadraban os maderos y feban aladros pa labrar.

Estos feban os mangos de madera de caxico, que mangaban as estrals os jadons y os jadicos.

Cuando feban os aperos qu'empleaban pa labrar, o carpintero y o ferrero se teneban qu'aduyar.

Entraba fierro y madera por ejemplo en o tablón, y tamién en os aladros dende a rella ta o timón.

Pa labrar n'aquellos tiempos a maquinaria yera corta, o que se feban ellos porque no n'abeba otra. Teneban tablón y chugo y una rella de madera, otro aladro de fierro a grada y a bertedera.

Teneban rusá y brabán ande yeran os campos grandes, amás de tablón un ruello y labraban con dos pares.

Con estos traballadors y con esta ofizialía, se remediaba a chen; ta afuera poco saliba.

Ta Chaca, Samianigo y L'Aínsa iba a chen a comprar, ta Uesca y ta Balbastro cuando o caso yera espezial.

Pa comprar os muebles güenos y bella ropa pa mudar, y por ejemplo bajilla, pa ixo abeba que marchar.

Pa comprar u bender machos u otra clase d'animal, se llegaban ta estos sitios que ye ande estaba o ferial.

Cuando iba a llegar a fiesta tamién feban un biaje, pa comprar comida y bebidas alpargatas y bel traje. O que trayeban d'afuera anís, coñá u pa entremés; o demás ya lo teneban, pollos, conejos y a res.

Agora que charro de conejos ixo yera majo de berdá, cogeban os que quereban pues no abeba enfermedá.

Tamién yeran afizionaus os musicos que buscaban, los trayeban con os machos cuando as fiestas llegaban.

Con candiles de calburo s'alumbraban pa bailar, en casa en teneban otro pa cuando iban a zenar.

Agora que charro d'as fiestas d'estos años qu'han pasau, o patrón de cada lugar yera mui bien zelebrau.

Se chuntaban os parientes lugars, bezinos y amigos, pa zelebrar bien a fiesta todos chuntos reunidos.

En algunos lugars d'estos de bar tampoco en teneban, como yeran todos amigos ni falta que les feba. En algunos sitios os mozos compraban tamién bebida, y la guardaban pa fiesta pa ellos y os que beniban.

D'as fiestas d'antes as d'agora nos han cambiau un abismo, pues que digan o que quieran o d'antes yera majismo.

Cuando llega a fiesta grande p'algo tiene que llegar, meteban a sopera en a mesa y a caserola en o fogar.

A sopera yera de tiesto con dos ansotas mui majas, y o guiso d'a caserola agarra-te que no ye palla.

Aquella carne d'obella mui gorda y mui natural, igual qu'a carne d'os pollos que estaban por o corral.

Con esta carne que les digo y o bino en abundanzia, que tamién yera de uga, pa qué quiers mellor farmazia.

Si bel ombre se pasaba y bebeba demasiau, con as juergas y güen brinco lo sudaba y arreglau. Cuando yera un poco tarde pero aún yera de día, ya empezaban o baile y lo beyeban toz, asina.

Agora biene o que biene, bailar con una mozeta, una porque te gustaba y otra pa animar a fiesta.

Si abeba una moza parada y un mozo la sacaba, nunca deziban que no y un par de piezas bailaba.

Si por casualidá alguna no sabeba bailar bien, tampoco estaba parada pues la sacaban tamién.

Ya beyez, a chobentú yera formal y aplicada, se sabeba comportar y nunca pasaba nada.

Por a mañana ta misa con o traje y a corbata, con os zapatos bien limpios y asta bel ramo d'albaca.

As mozas yeran majismas, tamién lo tiengo que dezir, baleban pa treballar y tamién pa pre sumir.



A muller golbiendo a calderada.

Cuando as mullers iban ta misa no se les beyeba a rodilla, llebaban as medias largas, poco escote y a mantilla.

Mantilla yera una prenda negra que se meteban en o pelo, y os biellos qu'eran más biellos tamién lo llamaban belo.

Os ombres con a chaqueta tamién con as alpargatas, y si no yera muita fiesta alguno iba con abarcas.

No abeba bancos en a ilesia, as mullers llebaban sillas, os ombres allá atrás solos más de pie que de rodillas.

Agora cuando dizen misa o cura nos charra de fren, antes charraba en latín y de culos ta la chen.

Tamién tiengo que dezir de os mozos forasteros, que se lo pasaban bien si no yeran faroleros.

En algunas casas ricas buscaban una muller, solamente pa guisar porque iban muitos a comer. Esta muller guisadera sólo iba pa treballar, cuasi no paraba cosa entre a comida y fregar.

Guisaba carne d'obella. pollos, patos y conejos, pa que estubiesen contentos os chóbens y os biellos.

Pa guisar estas comidas y escobar y fregar, siempre yera a muller y l'ombre sin aduyar.

Algunos sí que aduyaban a muller en bel momento y tamién n'abeba otros que llegaban majaretos.

Otra cosa que teneban as mullers que crosidar, yera os gatos de casa que estaban por o fogar.

Aquellos gatos d'antonzes no se les daba comida, así qu'os pobres animals se rebuscaban a bida.

N'abeba animals d'estos que se golbeban ladrons, porque iban a cazar y no alcontraban ratons. No teneban otra faina y siempre a la espectatiba, asta destapar o puchero cuando a muller se'n iba

Otros gatos se marchaban ent'a calle u t'o pallar, por zargallanas u pacharos: algo abeba que cazar.


Tamién teneban o perro pero no pa estar parau; si no yera pa cazar yera pa cudiar ganau.

Todos sabemos que o perro ye agudo y espabilau; o gato, antimás d'ixo, ye mui pillo y rematau.

A chobentú que abeba n'aquellos tiempos pasaus, sabeban como os d'agora sin aber-les enseñau.

Se sabeban dibertir, l'aduyaban a o destino, y llebaban siempre as cosas cada una por su camino.

Fa años en os bailes al acabar de bailar, as mesachas se chuntaban en un corro pa charrar.



A mesa preparada pa cuando lleguen os ombres.

Os mozos a la espectatiba por si tocaban otra bez, pa bailar con a que les gustaba, a bier qué se podeba fer.

Si a mesacha le gustaba o zagal da-le que da-le, y allá o zaguer día deziba: pues ya le'n diré a mi madre.

Ya terminada a fiesta os chóbens se separaban, luego llegaban campanadas que uno u otro preguntaban.

Pa terminar o arreglo teneban que descurrir, si imbentar-sen bel biaje u coger papel y escribir.

En estos casos l'ombre yera o que rompeba o fuego, pa conquistar a zagala y luego charrar con o suegro.

Cuando iban t'o lugar d'a nobia porque algo abeba qu'arreglar, siempre lo feban de noches, de día no se teneba que entrar.

Yera una costumbre rara d'aquellos tiempos d'antes, y otra costumbre d'o nobio de llebar-se acompañante. Este amigo d'o nobio lo llamaban aponderador, y al esplicar os intereses siempre lo feban mellor.

L'ombre que aponderaba lo sabeba fer mui bien, pero que en una ocasión metió a pata tamién.

Me falla un poco l'oído dijo o nobio de momento, y l'otro enseguida dijo: «ye más sordo que o zemento».

Así quedaba o recuerdo d'aquellas fiestas inolbidables, se casaban os chóbens y emparentaban os padres.

A que iba ta l'otra casa normalmente yera a muller, y dimpués que se casaba no le faltaba qué fer.

Tamién abeba otra cosa en esto fallaban os padres, que teneban muitos fillos y poca comida pa dar-les.

Les diré cómo criaban os críos n'aquellos días: primero teta d'a madre y dimpués sopas bullidas. Antes no abeba yogurs y a os crietes les daban, as sopas que les he dicho y leche de baca u de craba.

Luego patatas desfeitas una tortillota franzesa, con una ropa en o suelo más seguros qu'en a mesa.

Con una serbilleta atada qu'en o cuello les meteban, a tortillota a piazetes ellos solos se la comeban.

Yeran todos mui agudos y algunos al tener fambre, cogeban a serbilleta y s'azercaban ta su madre.

A los cuatro u zinco años que estaban medio criaus, ya iban a chugar t'a calle y baleban pa mandaus.

Si trayeban una col. que iban con su madre t'o güerto, porque eba treballau o crío estaba contento.

Otra cosa que a os pequeños les feban treballar, cudiar tozinos y corderos y en berano espigar. Todos os días os críos feban o que beyeban, y poco a poco ellos solos sin dar-se cuenta aprendeban.

Dimpués de os zinco años teneban qu'ir a estudiar, si abeba maestra bien y si no, ta otro lugar.

En Santa María de Buil lo pasaban regular aquellos críos pequeños cuando iban a estudiar.

Abeba muitas aldeas por o monte desanchadas, asina que pa aprender un poco arrea güenas andadas.

En otros sitios, pardinas y mesones y molinos, asina que pa ir t'ascuela un par d'oras de camino.

Os pequeños muitas bezes iban t'ascuela de malas, por o frío, por a calor u por bella granizada.

Yera o mayor que guiaba u los cogeba d'a mano, porque cuasi siempre yeran cuatro, zinco u seis ermanos. Si o que enseñaba en a escuela en bez d'ombre yera muller, as zagaletas chiquetas aprendeban a coser.

Ya dejaban d'estudiar sobre os catorze años, unos a treballar en casa y otros defuera todo l'año.

Os libros d'o primer crío tamién pa os demás baleban, porque les compraban pocos y tampoco los rompeban.

O que yera un poco aplicau si bel rato le bagaba, se miraba aquellos libros y el solo los repasaba.

Imos a dejar os críos y agora les boi a esplicar, otro gasto d'os lugars que abeba que soportar.

Este gasto que les digo un caso más que pasaba, no ye que fuese perder muito pero l'alcalde lo pagaba.

Pues abeba una pareja que llegaba tarde en cuando, yera la Guardia Civil tamién beniban andando. Iban ta casa de l'alcalde si abeba algo que resolber, y con poco porfiar se quedaban a comer.

Asina que en aquellas casas o mellor d'o que teneban, yera pa os forasteros que muitos días beniban.

Otra cosa un poco rara seguro les ba a estrañar, pues les digo que ye zierto yo no los quiero engañar.

Cuando alguno se moriba, o que gosaban fer, en terminar o entierro imbitar-los a comer.

Una misa con tres curas y unos ombres que cantaban, lo feban os más ricos y misa de terno la llamaban.

Os curas que zelebraban os ombres qu'eban cantau, se chuntaban en a mesa y bel pariente allegau.

Les mataban una obella cuando abeba muita chen, comeban sopas y chodías y a todos les iba bien. Pues ya tos podez pensar o que pasa n'un banquete, allá a fin de a comida siempre se charra más fuerte.

O personal se dio cuenta que no yera güena tradizión, poco a poco fueron cambiando y s'acabó a imbitazión.

Dejamos a defunzión y golbemos con o treballo, que de mayo a setiembre tamién teneban güen tajo.

Les llegaban os alfalzes o peperigallo y a beza, pa cortar-lo en pocos días y tamién si abeba tefla.

Ya nos deziba l'agüela: de San Chuan ta San Miguel olbída-te, fillo mío, de tabierna y de muller.

Luego sembrar as patatas tamién echar as chodías, dimpués de labrar a tierra, todo por os mismos días.

N'a tierra abeba tempero y o güerto bien arreglau; como o tiempo acompañaba nazeba todo escapau. Asina que a os pocos días estaba todo mui majo, prepara-te pa maigar que esto yera otro treballo.

O peperigallo de simiente no lo teneban que olbidar, porque se cayeba o grano si lo dejaban pasar.

N'este treballo d'as yerbas tamién aduyaba a muller, pa dar-les güelta con a forca y entrar-las si iba a pleber.

Se dallaba otra yerba, tamién por estas engüeltas, que se criaba en os praus y ésta la feban en tuertas.

Agora que charro d'a montaña que ye ande yo he naziu, en o Semontano y tierra plana tamién ye treballo apaiziu.

En este tiempo llegaba tamién o día d' esquirar, y a mejor fer bel biaje pa acabar de descansar.

Tamién en o mes de chunio abeba que mantornar, rico yera labrar os campos que estaban sin sembrar. Antes teneban os campos pa dos añadas preparaus, os metades los sembraban y en l'otro estaba parau.

Teneban que labrar bien os campos que no sembraban, pa que no'n abese yerbas, y as tierras se descansaban.

Por fin llegaba a siega y abeba que recoger, cada uno o que teneba con aduya de a muller.

Esto sí que yera serio cuando abeba que segar, y aprobechaban o día por o que podeba pasar.

Por si alguno no lo sabe o que podeba pasar, si feba aire s'esgranaba y podeba apedregar.

A maquinaria que abeba pa segar zerca y lejos, yera un pequeño restillo con a dalla y os benzellos.

Si teneban muitos campos se buscaban chornaleros, pero si en teneban pocos se lo feban solos ellos.



Esmolando a dalla.

Primero cortar a garba, dimpués a fer as gabillas, luego poner-las en faxos bien pretos con a rodilla.

Donde abeba un ombre solo con a muller u zagals, en un día se segaban sobre os dos terzenals.


Dimpués de dallar a garba de atar y afaxinar, aún quedaba otro treballo que ixe yera restillar.

Con a cosecha en o faxo s'empezaba a descansar, pero espera-te, mesache. qu'hai que carriar y trillar.

Pa carriar luego os faxos ixo sí yera amadrugar, a las tres de a mañana se teneban que debantar.

Sobre las ocho u las nuebe se tendeba a pallada, y asta que estaba menuda, poco u cosa s'aturaba.

Enganchaban os animals y empezaban a dar güeltas, primero o trillo d'arrastre, y dimpués con o de ruedas.



L'autor leyendo en Arguis

Que si trillar con os machos dar-les os cantos ta entro, u encontornar con a forca, no s'aturaba un momento.

No pensez que aquellos machos no se ganaban a comida, primero carriar de noche y dimpués trillar de día.

Luego a replegar y a abentar y por fin están separaus, todo o grano de a palla, o solero y os branzaus.

Ixo d'abentar yera con a forca y siempre a mano, echar a palla un poco alta pa que se separase o grano.

Pa fer esta faena d'aire no'n puede faltar, seiga zierzo u buchorno, se nezesita pa espallar.

Dimpués d'espallar o montón o trigo queda n'un lau, pero con palotes y piedras que ixo yeran os branzaus.

Güelta a esperar a l'aire y allí quietos en a era, pa echar-lo otra bez t'alto con a pala de madera. Teneban un restillote mui majo y mui chicorrón, con o que quitaban bel palo que quedaba en o montón.

Aquellas talegas de cañimo agora las tienen que emplear, pa llebar o trigo ta casa y a palla se queda en o pallar.

Pa entrar a palla empleaban o que les boi a dezir: as forcas, una escalera, cuatro brecas y un mandil.

Con toda a cosecha en casa aún quedaba bel chornal, pa replegar o balcuzo y echar-lo en o corral.

T'o corral todo acudiba: con o balcuzo se pudriba, dando-le dos u tres güeltas: ixo yera o fiemo que saliba.

As escobas que empleaban pa escobar bien a era, tamién las feban ellos con material de senera.

Mientras fan todo esto en o güerto hai que pensar: quitar yerbas, ir maigando y tarde en cuando regar. Aún abeba otra costumbre pa acabar de ser esclabos, si cayeba una tronada coge os machos y sembrar napos.

Luego ya yera más descanso: cuando setiembre llegaba, a cosecha estaba en casa y o treballo no apuraba.

Agora a sacar o fiemo trayer bel biaje de leña, tamién coger as chodías con os críos y a dueña.

Esto no correba prisa y se podeba descansar en este mes de setiembre, y en otubre a sembrar.

Abeba terrenos frescos que pa San Miguel u antes sembraban, y tamién en abeba otros que asta toz os Santos esperaban.

Pa comprar abono u nitrato algunos no teneban diners, y si abeba poco fiemo tamién feban forniguers.

Esto yera artos y aliagas que teneban que picar, bien puestos con tierra enzima la teneban que quemar. A tierra que se quemaba la desanchaban por o campo y esta feba de fiemo, no yera gran adelanto.

Poco a poco treballando o güen tiempo se pasaba, y luego cara t'o ibierno porque enseguida llegaba.

Por más que llegaba o ibierno tampoco estaban paraus: cortar madera, limpiar zequias y fer paré en os zerraus.

Luego yera otra faena, a cosa yera no aturar, fer a leña en o monte y trayer-la pa quemar.

A leña que trayeba l'ombre y a pazenzia d'a muller, to'l día fendo fuego si ye que quereban comer.

Antes no abeba butano ni corriente pa enchufar, asina qu'espabila un poco si te quiers calentar.

Tamién teneban antonzes güertos por medio o lugar, con artos por as paredes y bel basón pa regar.



Arguis: Campos de o plano.

En o que llaman Semontano allí no abeba madera, pero teneban olibas muitas biñas y almendreras.

Pa comer a crabería buenos carrascals teneban, y luego ganau de lana, total que se defendeban.

Por Coscullano y ixos pueblos incluyiu Arguis y Nueno, feban leña menuda y la bendeban en ibierno.

Con un carrote chicote y no güenas caballerías, baxaban leña ta Uesca ta bellas panaderías.

Como yera tiempo d'ibierno otro quefer no teneban, sacaban perras de a leña que pa algo les baleban.

Boi a nombrar-les un poco os trastes que no s'emplean, asina los recordarán algunos d'os que lo lean.

Si alguno no los conoze porque no ha treballau, que le pregunte a bel biello si en tiene por allí a lau. Antes n'a puerta de casa estaba a branquilera, pa zerrar yera una tranca y pa chirar a gorrunera.

O chugo y bastes los teneban n'o patio bien arreglaus, cabestros y cabezanas en una estaca colgaus.

Zerca d'o patio a bodega con o bino encubau, en bez de grifo un zurrete con una cuerda atau.

En a cozina teneban o escorredor y a espedera, o escorredor pa os platos y l'otro p'as coberteras.

A tenalla con l'agua siempre a lau d'a fregadera, y si no teneban tenalla os cantaros n'a cantarera.

Pa sentar-se en o fogar allí teneban a cadiera, una en cada lau d'o fuego y detrás a tizonera.

Tamién teneban n'o fogar o calderizo pa o caldero, y pa alumbrar-sen con tiedas pa ixo estaba o tedero. Luego teneban as estreudas y unos pellejos n'a cadiera, y pa zerrar a bentana una aldaba de madera.

Pa xabón yera arena, pa esparto un benzello, y pa os polbos talco quera de maderos biellos.


Cuando mataban o tozino empleaban a garroneta, y pa zerrar a puerta d'a era algunos teneban cleta.

En o corral d'os lugars teneban a jarmentera, y en a puerta de casa allí estaba a gatera.

Una ferramienta d'a era lo llamaban retabillo, tamién abeba encontornadors que se meteban n'o trillo.

Abeba otras ferramientas, ya no se suelen emplear: ixa falz con a zoqueta y una tabla pa labar.

O cuartal, o doble u fanega lo gosaban emplear cuando mediban o trigo pa bender u pa sembrar.



O chugo, o baste, maquina pa cortar remolacha y a bazía. (Museo d'Artes Populars de Sarrablo, Samianigo)

Otra mida más chiqueta, esta almú lo llamaban, que lo feban de madera porque tamién lo empleaban.

Pa pesar grano u patatas a romana u carrazón, dimpués ya llegó a bascula con a modernizazión.

Un forato en a paré más grande u más pequeño, pero si pasaba agua lo llamaban aguatiello.

Cuando ferraban os machos pa que andasen mellor, empleaban o pujamante y a bezes o torzedor.

Tamién feban colada d'aquellas ropas tan fuertes, empleaban o cuezo, a coladora, zeniza y agua caliente.

Luego estaban os maseros que empleaban pa masar, y o treballo de fer os pans tamién lo boi a contar.

Antes comeban o pan que cada uno se feba, lo guardaban en un saco, pa quinze días teneban. Agora tenemos pan Bimbo pan moreno y pan sin sal, y menos mal que aún esiste por suerte o pan natural.

O pan lo feban en casa l'ombre u a muller, a farina que n'abeba la teneban que zerner.

Calentaban bien o forno fendo fuego primero, y luego pa limpiar-lo con o foricón y o escopallero.

Zerneban bien a farina pa que o pan fuese mellor, y pa ixo empleaban o ziazo y o zernedor.

Pa zerner tamién tubon una maquina bel día, la llamaban o torno y estaba en a masedría.

O que teneban que fer a brispa de masar, preparar a lebadura y guardar-la en o fogar.

A o día siguiente echaban a lebadura con agua templada, iban mezclando a farina y asina empezaban a masada. Cuando estaba correosa y feban una güena pasta, la sacaban d'a fabla bazia y la meteban en canastas.

Cuando estaba en as canastas la teneban que tapar, dimpués feban os pans y ixo yera reparar.

Cuando o pan estaba cozido por o color lo notaban, y con una pala mui larga poco a poco lo sacaban.

Dimpués de sacar os pans o día eba siu majo, y a os quinze días u antes güelta a lo mismo treballo.

A muller treballaba muito como pueden comprobar, agora lleban pantalons pero antonzes ni hablar.

Ixo que llaman machismo agora s'ha terminau, pero en aquellos tiempos yera un poco demasiau.

Abeba bellos ombres que pa bien u pa mal, sabeban que yeran os amos y os demás a callar. Si bel crío protestaba se dirigiba a su madre, calla por Dios fillo mío, porque l'ha dicho tu padre.

Pocos teneban dos fillos cuasi todos cuatro u zinco, todos nazeban en casa sin aber bisto o medico.


A comadrona yera afizionada; sin aber estudiau cosa se feba cargo d'o parto. ; no estaba poco orgullosa!

Pa os críos no abeba cuna dormiban en cama grande, en o rincón u en medio de su padre y de su madre.

O que teneban que fer fese calor u fese frío, yera poner una piel debajo o culo d'o crío.

Si ploraba un poco fuerte u sentiban bel roído, iban corriendo ta cama; o crío se s'eba cayito.

Yo sé d'una familia pero no digo en qué pueblo, pa que os críos callasen echar-les azúcar en o suelo.



O fogar y as cadieras. (Museyo Orensanz d'Artes Populars de Serrablo, Samianigo)

A os crietes pequeños bien que los espabilaban, siempre a callar y a comer a comida que les daban.

Si abeba una comida y a o crío no le gustaba, u come-te-la a la fuerza u pa zenar le'n guardaban.

Llebábamos desgarrons antes por nezesidá, agora los lleban aldredes mira qué casualidá.

Pa coser-nos o pantalón cuando yo era pequeñet, nos echaban en a cama pa no enseñar o culet.

Agora algunos se lebantan y cuando se ban a bestir, no saben o que poner-se de tanto que hai que eslegir.

Tamién beyemos por a calle a madre dezaga d'o crío, ye a ora de brendar, o qué quieres, fillo mío.

Antes treballaban más pa chugar o tiempo chusto, y no te daban a brenda pa que zenases a gusto. Feban una tortilla con muita miga de pan, y te daban un piazote con patatas pa zenar.

Ixo yera muitas noches o que zenaba a familia, y si eban muerto o tozino pa o segundo morzilla.

Bellas bezes berdura o que zenaban algunos, asta que llegaba o frío y se chelaban os grumos.

No se podeba eslegir ni andar-se con fateras, abeba que comer en casa cada uno o que teneba.

Agora hai bellas familias que a la ora de zenar, por no treballar en casa cogen y se'n ban ta'l bar.

Comen cuatro costillotas y bella parrillada, y a la ora de pagar ixo ye una animalada.

Luego dize a muller: nos han cobrau demasiau, y l'ombre le contesta: denguno nos eba llamau. En estos lugars antes a basura no esistiba, porque l'aprobechaban todo y lo gastaban cada día.

Por ejemplo una col dimpués d'aber-la criau, anque les paizca mentira todo yera aprobechau.

O que llamamos o grumo lo meteban a cozer, que baleba p'as presonas pa zenar y pa comer.

Teneban hojas mui grans, cuando a col está criada, estas yeran pa os tozinos crudas u en a calderada.

Luego hai un piazo de troncho que éste tamién se gastaba, bien cortau con a noballa pa os conejos u pa a craba.

Aún queda un piazo de troncho con as raízes plantau, lo picaban con o jadón y lo echaban ta un lau.

Luego o troncho se secaba y se gosaba quemar, con artos, ramas y aliagas que baleban pa femar. Igual que a istoria de a col ye a d'otros alimentos, como a remolacha, os napos, as azelgas y os pimientos.

Pa recoger a basura al comer en a cozina, acudiba o perro, o gato y asta bella gallina.

O perro debaxo a mesa, por si algo se cayeba; o gato por allí a lau que tampoco se mobeba.

Por ixo o perro y o gato nunca se podeban bier, bibiban n'a misma casa y con poco pa comer.

As cascas de os güegos os bichos no las comeban, estas iban t'o corral con o fiemo se pudriban.

Os pelaus de as patatas y de as frutas si en teneban, los echaban t'o caldero y os tozinos los comeban.

Si bella bcz llegaba ta casa bel papel, éste acababa en o fuego y se calentaban con él. Si bebeban coñá u anís a botella que compraban, cuando ya estaba bazía pa tomate la empleaban.

Pa o bino no abeba cajas ni pa o azeite platicos, yera azeiteras de chapa y toneles y boticos.

Tantas bolsas de plastico que oi tenemos asabelas, antes no abeba denguna ni falta que les feba.

Con a zesta, con a alforcha se las arreglaban bien, con o saco, a talega y con canastas tamién.

Sin embases ni nebera pa a leche que se gastaba, la llebaban ta o puchero dende a baca y dende a craba.

Sin poder-lo remediar algún macho se moriba, y lo sacaban a rastro con otra caballería.

En as afueras de o lugar en o monte lo dejaban, se lo comeban os butres qu'a l'otro día llegaban. Estos animales muertos en tres días desaparezeban, porque acudiban bichos que todo o día comeban.

Dejaban os güesos limpios semejantes abeluchos, luego se lababa o suelo que tamién plebeba muito.

A naturaleza ye maja todo está bien preparau, pero somos as presonas que lo emos empeorau.

He charrau un poco d'os machos al empezar a escribir, agora se me ocurre otra cosa tamién lo boi a dezir.

Os machos yeran mui listos, charrar ellos no podeban, pero si charraba l'amo muitas cosas entendeban.

En todas as casas abeba burros, machos y bel caballo, que aduyaban a carriar a comida de todo l'año.

Estos pobres animals se les soleba castrar, a os dos años de bida y a os tres a treballar. Os burros no se capaban, teneban poca potenzia, si se les feba ixo yera no tener conzenzia.

Cuando yo les digo macho ye como si les dezise mulo, pero no balen pa padres por si no lo sabe alguno.

De os burros con as yeguas y caballos con as burras, d'este cruze ye d'ande salen toz os machos y mulas.

Les poneban una carga igual de noche que de día, ellos siempre iban ta casa a llebar a mercanzía.

Cuando llegaban ta casa con trigo, patatas u leña, pa aduyar a descargar siempre bachaba a dueña.

Bella muller deziba: cuánto que les has cargau, y l'ombre le contestaba: «a tú denguno t'ha llamau».

«Qué bruto que ye este ombre, no se le puede ni charrar y estos pobres animals cuánto tienen que aguantar». S'arreglaban os caminos pa que no estasen mal, a prenzipios d'o berano, ixo yera ir de bezinal.

Cortaban ramas y artos s'espedregaba tamién, pa no estropiar as cargas y pa poder andar bien.

Asabelas oras de o día n'os caminos se pasaba, os ombres tamién de noche cuando carriaban a garba.

Si de noche no abeba luna y o zielo estaba anublau, pa andar aquellos caminos yera un poco demasiau.

Dimpués de cargar os machos ellos solos ya marchaban, no perdeban o camino ni tampoco trepuzaban.

Donde yera mejor terreno allí empleaban o carro, agora tampoco lo usan pero boi a recordar-lo.

Cuando feban bellos carros les poneban meriñaque, pero a os bulquetes no porque yeran basculantes. Algunos ricos teneban una tartana mui maja, pa ir l'amo de biaje más bien en a tierra baja.

Tamién teneban bulquete pa o fiemo d'o corral, pa graba, pa remolacha y pa leña d'o carrascal.

Luego estaba a galera que la soleban emplear, p'as cosas de más bolumen y más ligeras de llebar.

En a tierra baxa teneban menos machos y más mulas, a de baras, a de ganchos, a de'n medio y delantera.

A de baras con sillín y en o cuello a collera, as retrancas por as ancas a zofra y a barriguera.

Pa cargar más llebaban as bolsas bellos carros, o que no sepa como yeran pues tendrá que preguntar-lo.

Si o carro iba zaguero penaba o macho de baras, y si iba delantero yera malo en as bachadas.



L'ombre y o macho labrando a tierra d'o güerto.

En a tierra plana cambiaban as costumbres de serbir, abeba más disziplina iban t'a cuadra a dormir.

En bellas casas teneban o chulo y a criada, mozo pequeño y mediano mozo mayor y de jada.

Por o contorno de Uesca siempre ha feito más calor, pero o ibierno yera como en a montaña u peor.

Rancaban a remolacha y iban a coger olibas, estando a boira bien preta que la teneban muitos días.

Con güena rosada en o suelo treballaban al descampau, sin embargo en a montaña estaban más abrigaus.

En a montaña con a madera estaban muito mellor, en o bosque no pega l'aire y os pinos dan calor.

En a montaña hai baguadas y resguardos pa o pastor, pero en a tierra baxa aguanta o frío y o sol. No beyeban o fogar os criaus de casa rica, zenaban más que deprisa y t'a cuadra con a pizca.

Con o pan y con a pizca y o bino que no faltaba, en a cuadra estaban calientes y al paso se descansaban.

Muitos campos, muitas biñas, muitas mulas y ganau, pero todo se gastaba con os de casa y criaus.

Con as mozas de o lugar en estudios no pensaban, pero sí en buscar-les nobio pa que luego se casaran.

Si este nobio no saliba y l'asunto iba despazio, interbeniban os padres y esto se llamaba atrazio.

Si abeba una chica buena, que yeran todas as de o pueblo, alguno le deziba a su madre: tenemos que charrar con Consuelo.

Cuando tú quieras charrar m'encantará d'escuchar-te, biene ta casa cuando quieras y charraremos un instante. Tienes una filla guapa y nusotros un zagal, han cumplido bente años los podébanos casar.

Le'n diré a Nicolaseta pero me contestará, que gusotros soz más ricos y Ambrosio no la querrá.

No te priocupes por ixo, que Ambrosio ye mui mirau, si a tú te paize bien todo esto ya está arreglau.

Se casaba con este ombre que l'abeban preparau, y a treballar ta otra casa sin aber-se enamorau.

Con a madre de o marido competiban todo o día, unas se llebaban bien pero otras no s'entendeban.

Si o caso yera a o rebés buscaban un ombre güeno, o chico iba ta l'otra casa y a éste lo llamaban yerno.

O que quereba ir de choben teneba que ir espabilau, pa conquistar a zagala y tener dinero aorrau. Si yeras de casa nombrada as nobias a perra gorda, y o que yera de casa pobre sudaba a gota gorda.

Tamién abeba un problema que teneban que pensar, si os padres d'uno y de l'otro se llebaban bien u mal.

Al ir ta l'otra casa llebaban con gran esmero a ropa que yera a pliega y o dote que yera o dinero.

Boi a charrar d'ixos puertos que bibiban a su manera; allí no teneban trigo, ni olibas ni almendreras.

Allí estaban os pinars que más ta zaga he contau, y tamién muitisma yerba pa que minchase o ganau.

Toda esta yerba saliba sin tener-la que sembrar, criaban muitos animals les baleban un dineral.

Antes no abeba cambions pa transportar a madera, y pa llebar-la a su destino lo feban d'esta manera. Siempre suele aber un río en a falda d'os pinars, asta allí llebaban a madera a rastro con os animals.

Dimpués de muito treballo y bastantes zaragatas, desenganchaban os machos y abeba que fer nabatas.

Entre A Espuña y Puyarruego abeba un sitio mui majo, donde feban as nabatas que marchaban río abacho.

Pero no marchaban solas las teneban que acompañar, guiando-las ocho días asta Tortosa a parar.

Este yera o río Zinca; porque antes plebeba y nebaba, baxaba siempre muita agua y ixo a la chen aduyaba.

Plebeba y nebaba muito, feba frío y calor, cada cosa en o suyo tiempo; no abeba otro ordinador.

En o pantano de Belsué tamién pasaban madera, dimpués d'aber-la trayiu dende o Puntón de Lusera. Cruzaban todo o pantano dende o Pellar ta l'otro lau, donde esperaba un cable que iba o madero colgau.

Primero cortar n'o monte luego arrastrar a madera, dimpués l'agua y o cable y por fin n'a carretera.

Agora cargar o cambión otro rato de treballo, por fin adiós a os maderos que ban carretera abacho.

Agora a faena ye d'o chófer que aún no emos terminau, a carretera no ye güena y tiene que ir con cudiau.

Me'n güelbo ta os Pirineos con as bacas, caballos y ganau, que se manteneban con a yerba que astí s'abeba criau.

Estos bichos que les digo toda a bida a la intemperie, cuando iba a cambiar o tiempo ellos marcaban a niebe.

Aguantaban en os puertos asta que empezaba a nebar, yera pa San Andrés u antes se teneban que marchar. Les poneban a os chotos pa ir cabañera abacho, unas esquilas mui grandes y con un collar mui mui majo.

Tamién llebaban un burro qu'estaba bien enseñau, con comida d'os pastors iba por medio o ganau.

Baxando de a bal de Tena dormiban en Monrepós, tamién en o Mesón Nuebo y más de cuatro en A Foz.

As d'Ansó, as d'Echo y d'Araguás de o Puerto, ixas iban por Ayerbe, tamién en o mismo tiempo.

Estoi charrando de as cabañas; baxaban de a güega Franzia, asta tierra Zaragoza, que hai un poco de distanzia.

As que pasaban por l'Aínsa yeran de a bal de Chistau que pasaban por Arcusa y Santa María de Buil.

Abeba cabañas grandes que feba goyo beyer-las; tres o cuatro mil cabezas y o pastor las conozeba.

Se parezen as presonas este ganau que les digo, as que son de a familia tienen un gran parezido.

Dos u tres días andando y paraban a estremar, ixo yera pa que comiesen y tamién pa descansar.

Cuando llegaban ta Uesca una por o Coso Alto entraba, por os Porches, San Orenzio, Padre Huesca a Santa Clara.

En a Plaza Santa Clara bellas bezes dormiban, tamién se quedaban otras que por o partidero beniban.

Cuando una cabaña d'estas por su cabañera pasaba, teneba a preferenzia todo o mundo s'apartaba.

Si en bella ocasión bel auto no paraba, o pastor con o tocho suyo enseguida lo arreglaba.

Os pastors charraban poco no se daban a entender, como estaban tan foguiaus se sabeban esfender. Les tocaban estas cosas cuando baxaban de o puerto, y en abril pa subir otra bez o mismo cuento.

En llegar a primabera as obellas lo sabeban, empezaban a belar si tan pronto no subiban.

Se m'olbidaba una cosa de dezir cuando plebeba, pues aguantaban l'agua igual de noche que de día.

Otra cosa importante que os pastors bejilaban, no perder dengún cordero si por bel pueblo pasaban.

No ye que fuese mala chen, ye que quereban comer, os cordericos tan zerca algo teneban que fer.

Antes una cabañera yera como una formazión, no la podeban cortar ni cambiar de direzión.

Boi a contar otro poco y con todos mis respetos, del luto que les llebaban a os que agora ya son muertos.



A craba y o crabito. A craba ye mocha.

Sobre todo as mullers todas de negro se meteban, cuasi yera demasiau pero antes asina lo feban.

A l'año u a os dos años de medio luto se meteban, un bestido un poco claro y as medias que suspendeban.

Si teneban flors en as bentanas las teneban qu'esconder, porque estaban de luto y flors no podeba aber.

Si iba una orquesta tocando por as calles de o lugar, al pasar por estas casas se dejaban de tocar.

Ixo de blanquiar a casa anque la tenesen mal, como estasen de luto en unos años ni hablar.

Anque abese chen choben se teneban que aguantar, un par d'años por o menos ni de juergas ni bailar.

Igual que as otras cosas esto tamién ha cambiau, agora lo fan como lo fan antes yera demasiau.

## O cambio y o d'agora

Asta l'año treinta y seis, que ye cuando esclató a guerra, chenerazions ta zaga bibieron d'esta manera.

Cuando terminó a guerra se quedó todo espiazau, dimpués de cuatro u zinco años lo paguemos bien pagau.

Poco a poco s'ha benziu y o que emos prosperau lo boi a contar agora que cuasi ye demasiau.

Sobre os años zincuenta s'empezó a notar o cambio, ya se comeba mellor y se compró bel arradio.

Tamién fueron empezando as fabricas y tallers, y no faltaba treballo pa ombres ni pa mullers. Con tanta modernidá a chen se fue enterando y poco a poco os lugars solos se fueron quedando.

Hai quien se'n fue por debán sin diners y con abarcas; agora golbemos con coche, miren si cundió a marcha.

Os ombres que treballaban n'as casas de labrador se marchaban t'as fabricas porque s'estaba mellor.

Con as mozas fue o mismo en busca de o porbenir, más qu'enganchar n'as fabricas se poneban a serbir.

Os que se iban marchando d'o pueblo t'a capital, guardaban fiesta o domingo y os sabados a cobrar.

Fue primero os chóbens que empezoron a pensar: pa tan poco benefizio esto ye muito treballar.

Discusiones con os padres tamién con bel parién, a chobentú se marchaba, dezaga siguió muita chen.



Árguis. O pantano, a ospedería y a carretera nueba.

Tamién hai bella casa, os que mellors campos teneban, s'han iu modernizando y aún esiste oi en día.

O que antes feba l'amo con a familia y o criau, oi lo fa con as maquinas y aún está más descansau.

Con a modernizazión en os lugars se metió mal, feba falta más dinero y desaparezeba o chornal.

O que de choben treballó muito, como antes les he contau, tamién ha faboreziu, pues denguno ha fracasau.

Aquellos mozos y mozas que marchoron de o lugar, tienen piso, han criau fillos sin tener-les que aduyar.

As casas y os corrals que tanto les eban costau, se quedoron en os lugars, algunas s'han espaldau.

En bellos sitios amostraban a profesión azelerada, beniban por os lugars fendo-nos propaganda. Ixo yera ir tres meses a treballar y estudiar, pa saber que una maquina se teneba que enchufar.

Ya no faltaba otra cosa pa animar-nos a marchar, y bellos biellos deziban ta ánde iremos a parar.

Algunos de os lugars esto lo beyeban fatal, pero o que teneba poco u cosa no lo beyeba tan mal.

O que se dezidiba a marchar dengún problema teneba, porque en aquellos tiempos enganchaba ande quereba.

As mullers tamién lo bioron, se dieron cuenta deseguida, no fa falta penar tanto pa estos días de bida.

Preferiban a un obrero si en a capital bibiba, que un eredero con campos pa treballar todo o día.

Fueron barias edades que marchoron de o lugar, más chobens y más biellos y otros a punto casar. Bellos que yeran nobios lo teneban que pensar, si fer-lo como antes u ta afuera a espabilar.

En casa lo teneban feito pero treballando demasiau, pendiens d'o tiempo, d'os campos, d'os suegros y d'o ganau.

Tamién se daban cuenta d'os fillos que iban a benir, si nazeban en o pueblo siempre o mismo porbenir.

Bel lugar pa pantanos otros tamién los plantaban, asina que pa más colmo o gubierno nos empuxaba.

A intelijenzia d'a chen tamién ha iu t'arriba, por fin en t'a capital y toz han dau salida.

Ya muitos por as fabricas y con ganas de treballar, les diré o qu'emos feito si ye que lo sé contar.

O que yera a ferrería s'ha combertiu en taller, con maquinaria moderna que da muito gusto de bier. Pa treballar en o fierro ya no fa falta carbón, se treballa todo en frío sólo apretando un botón.

Empezemos con a arradio que ya yera güen capricho, agora tenemos telebisión quién lo eba d'aber dicho.

Lababan en os barrancos con frío y a cualquier ora, agora dentro de a casa tenemos a labadora.

Agora l'agua biene sola, antes a buscar-la t'a fuen, se duchaban cuando plebeba y agora asta sale calién.

Tenemos ya telefono que antes no se podeba, pa charrar en casos urgentes ya les diré o que abeba.

As cabinas de a calle, o telefono en o coche, y luego o que está en casa que charramos día y noche.

Todos estos adelantos hai que saber-los controlar, si no lo femos asina no ganaremos pa pagar. O telefono portátil quién se creye que ye zierto que podébanos llegar a tener ixe conzieto.

Os que tienen todo esto y que aún s'estén quexando, si estoi con aquellos me'n boi y se quedan solos charrando.

O lababo y a bañera está mui bien imbentau, tampoco me negarez que se gasta demasiau.

Pues mia a luz eleutrica tamién tiengo que dezir, si agora nos la quitasen no se podría bibir.

Boi a esplicar una cosa que le pasó a un montañés, baxó a bender un macho ta feria de San Andrés.

Al bier a luz eleutrica se quedó un poco perplejo, subió una bombilla ta casa y la colgó n'un benzejo.

Tamién están as neberas que treballando han beniu, si nos las esen dau antes no las abríanos queriu. O asunto d'as basuras saben qu'antes no'n abeba pero sin embargo agora n'hai un montón cada día.

Cuando emos llegau d'a compra sea l'ombre u a muller, fa más bulto a basura que o que bale pa comer.

Pa dos piazotes de queso, una bandeja, un plastico, más o codigo de barras que no sé pa que ye ixo.

Cajas pa bino y pa leche y pa os güegos un cartón, etiquetas y prezintos, todo ye contaminazión.

O salchichón y o chorizo los beirás bien rebozaus, dende una punta ta otra paize qu'están refriaus.

Pues mia a carnizería tampoco falta papel, lo pasan por a báscula y marcha ta casa con él.

As pilas d'o reloj y a radio cuando ya s'han terminau, ixo dicen que ye malismo, contaminan demasiau. Os detergentes d'a cozina y frascos d'o cuarto baño, acaban en a basura y son muitos a fin d'año.

Antes se criaban guichas y garbanzos y chodías, las guardaban en talegas n'a falsa u en as masedrías.

Agora dentro d'unas latas ponen este conteniu, pero guichas no'n berás porque han desapareziu.

Con l'agua que sale d'a cheta, no nos queremos conformar, algunos ban a comprar-la y más botellas pa tirar.

Hai bajillerías enteras, de usar y de tirar, mui majas y mui comodas pero pa contaminar.

Ixas comidas d'ermandá están mui bien imbentadas, pero allí están as basuras, se forman a carretadas.

Luego lo limpiamos todo dimpués d'aber-nos fartau, biajes t'o contenedor que se queda bien apretau. As basuras las quemamos, que sacan güena fumera, os butres no comen cosa y que se salbe o que pueda.

Boi a dexar as basuras por si alcaso estaz comiendo, pero tos diré otra cosa pa que podaz ir leyendo.

Mancomunidá d'o Semontano antes tampoco esistiba, sin embargo ye una cosa d'as güenas d'oi en día.

En todo o contorno de Guara han puesto contenedors, pa replegar as basuras y ebitar malos olors.

Si bas a comer ta o monte con o frío u con calor, y paras n'un sitio aparente allí está o contenedor.

Sitios que no hai carretera son pistas y además duras, tamién ban con o camión a replegar as basuras.

Todos pagamos por esto pero no ye de doler, si hai güena direzión y se puede mantener. Tamién tiramos os trastes que antes nos esen baliu, esta chen se nos los lleba y está todo recogiu.

Esta Mancomunidá coge muitisma estensión, boi a bier si sé nombrar-les toz os lugars que son.

Boi a meter interés precurando fer-lo bien, y no dexar-me a denguno empezando por Bizién.

No sé si acabaré pronto u me costará unos días, pero de momento sigo por a Benta de Ballerías.

Está Uerto y Salillas y o Castillo de Pompién, As Casas y Pompenillo y con Sesa esto ba bien.

Tramazed y Monflorite lugars mui güenos son, igual que Albero Alto y sin olbidar a Usón.

Está Bespén y Nobales que ye una tierra mui güena, ande se cría de todo igual que en Tierz y Quizena. Torres de Montes y Blecua, Antillón y Bandaliés, y marchando por San Chulián nos azercamos ta Igriés.

Alcalá de lo Bispo y Chunzano están zerca de Belillas, y Alerre y Banastás tamién d'o lau de Chimillas.

Está Ola y tamién Pueyo mui zerca de Fañanárs, y pa llegar asta Angüés hai que andar un piazo más.

Cuando Dios fizo o mundo pasó por Sietemo y Casbas; les dijo: astí queda ixo, cerca están Sieso y Labata.

Liesa, Arbaniés y Castejón, lugars que no están mal, como Sipán, Os Zertales, y L'Almunia d'o Romeral.

Santolaria a Mayor, allá arriba en a ladera, debaxo Sasa de l'Abadiau con Loporzano y Ayera.

Tenemos Badiello y Panzano, Aguas y Castilsabás, con Coscullano, Barluenga y ya me'n queda pocos más. Agora le toca a Pertusa con Cherluco y Arascués, más Ibieca, Os Molinos y o lugar de Sabayés.

Tamién hai contenedores en o campo de abiazión, asina está siempre de limpia toda aquella estensión.

Santolaria de a Peña o más alto sobre o mar, con Nueno, Belsué, Nozito y con Bentué de Rasal.

Se m'olbidaba Yéqueda con su modernizazión, igual que o lugar de Arguis, que mereze atenzión.

Ixo de as bacazions algunos lo beyen mui bien, de que a muller marche sola y l'ombre solo tamién.

Esto son as modas d'agora esta ye a bida que tenemos, no sé por qué la ferán asina, ya les ne preguntaremos.

Os que tienen sesenta años setenta, ochenta u zien, estos sí qu'están contentos y dizen que ya está bien. Ombres de setenta años qu'han labrau con bertedera, agora ban con un carrote ta l'Aldi a comprar azelgas.

Ban ta l'Aldi a comprar azelgas. y o que faiga falta pa comer; antimás lo fan contentos, pa descansar a muller.

Aquellos chóbens d'antes que denguno estaba parau, agora se lo cobran un poco por o que hemos prosperau.

Se casón d'aquellas trazas que tos he contau tazaga, y por ixo muito cuesta bier a muller descansada.

O qu'han feito estas mullers l'ombre lo sabe apreziar, les ha llebau bien a casa y iban ta otra a fregar.

Fer o treballo d'ellas a fregar ta l'otro lau, llebar os críos ta escuela pero nunca s'han quejau.

Pa bebir en este mundo hai que tener conformidá, si te llebas bien con a muller ya ye una felizidá. Agora han llegau os fillos que no unimos demasiau, porque ellos no aprezian tanto o que emos treballau.

Cuando se casan agora lo quieren todo arreglau, sin parar-sen a pensar que a mejor no l'han ganau.

Algunos porque no han podiu, otros que se l'han gastau, siempre en ha abiu de to, dejemos esto empezau.

Agora tenemos parellas no están en casa en to'l día, porque treballan os dos y os críos t'a guardería.

Tamién ta casa de os agüelos además de a guardería, lleban os críos pequeños y en ibierno antes de día.

Os críos de fuera casa, ellos dos a treballar, y cuando güelben ta o piso todo está sin arreglar.

Agora biene o que biene discusiones y disgustos, y al poco tiempo t'enteras de que ya no biben chuntos.



Biella trilladora de as añadas 60.

Está bien todo o progreso pero ixo que a muller treballe de fuera de casa no lo acabo d'entender.

Si l'ombre gana dinero y a muller pa aministrar, cudia os fillos, limpia a casa qué más puede desear.

Si treballan os dos fuera y se ganan su chornal, si no l'alministran bien pues siempre estamos igual.

Tamién me paize a yo que sabiendo a obligazión, uno en casa, otro fuera ye mejor a relazión.

Pues fija-te ixos cajons de l'aire acondizionau; ye otro güen adelanto, no me gustan demasiau.

Dios me deje l'aire zierzo que ye güen refrescador, y si alcaso en o berano pues con un bentilador.

L'asunto de o ganau, un progreso de os primeros, agora les crían todo l'año y asta paren dos corderos. As obellas no pisan niebe ni las sueltan ta o zerrau, ni se punchan n'as aliagas, ha llegau o granulau.

Ixo ye un prenso compuesto que le dan a l'animal, desarrollan y produzen pero no ye tan natural.

N'aquellos tiempos os corderos no se feban tan grandes, porque no abeba compuesto y yeran parientes os padres.

Si un cordero les gustaba lo dejaban pa mardano, pero no pensaban nunca que yera de su padre ermano.

Como he dicho en o prinzipio, antes muito treballar, pero ixo no ye pro pues tamién hai que pensar.

Aquellos pasos de cabañera que antes yeran tan sagraus, han naziu pinos y matas, muitos trozos s'han borrau.

Agora a yerba se malmete, cuasi no'n queda de ganau, no balemos pa pastors, balemos pa estar paraus. Tamién balemos pa juergas pa drogas y pa dormir, a esta marcha que llebamos beiremos o porbenir.

Antes mataban una obella, u mataban una craba, la colgaban n'a bodega y una semana se guardaba.

A carne no se pasaba porque yera natural, y o clima güenismo; cosa abeba artifizial.

Otra cosa nezesaria que no abeba en aquellos años, y agora ye impreszindible ixo ye o cuarto de baño.

Les he esplicau cómo feban as casas en o lugar, agora beyen cómo se fan: no se pueden comparar.

D'os carros y machos d'antes de ixo ya no en queda cosa, pero sin embargo os autos crezen una buena cosa.

Unos por obligazión, otros tamién por capricho, sólo se bibe una bez y a comprar auto s'ha dicho.



Trautor en Arguis en a modernizazión.

Tenemos a panadería, o medico y a farmazia, todo en a puerta de casa; tamién ye güena gananzia.

Agora os críos pa estudiar lo tienen todo debino, mellor que su padre y su madre por aquellos malos caminos.

Tenemos ordinador, coches que hablan oi en día, ye que si lo miras bien paize ya una brujería.

Luego está o mando a distanzia y ixo que lo llaman facs, no sé si estarez conformes u abrá que prosperar más.

Con una entena d'as grandes o que se bei en a telebisión, y a cadena musical con os críos n'a abitazión.

Os meses d'agosto y chulio ya dije cómo yeran antes, y agora estos dos meses todos po'l mundo t'alante.

Si bas ta'l banco por diners u en llebas pa guardar, todo lo fan as maquinas, no se suelen engañar. Si a muller tiene bacazions y a l'ombre no l'han tocau, ella se'n ba por a playa y l'ombre por otro lau.

A mellor se queda en casa aburriu como una ostra, si le paize fregar, frega, y si no, mellor p'as moscas.

As fregaderas d'agora son más majas cada día, si no t'olbidas de o Mistol, de o esparto y d'a lexiba.

O negozio de a carne éste se nos ba de as manos, os chóbens no conozen ni as borregas ni os mardanos.

O rabaño de obellas que por o monte abeba, o que yera güen pastor n'a cara las conozeba.

Al desapaizer os machos s'acaboron os basteros, a ferrería olbidada y adiós tamién a os sogueros.

Agora ye a cosechadora y tratores pa labrar, pero aquellos campos pequeños no se pueden treballar. No se pueden treballar y tampoco ye rentable, pa cuatro palmos de tierra no bas a estar toda a tarde.

Asina que muitos campos están ya meyo borraus, de barzas, pinos y aliagas todo o monte s'ha poblau.

Aquellas sendas tan majas ande a chen s'apasiaba, os caminos de ferradura ya no se conozen miaja.

En abeba bella fuen que adornaba o monte más, agora bas ta o mismo sitio: ni senda ni fuen beirás.

O que conozca o monte y lo quiera besitar, más le bale estar-se en casa porque no le ba a gustar.

Y ya l'albierto tamién pa que no pase mal rato, no berá perdizes ni conejos, ni pacharos ni lagartos.

Como pueden bier, siñors, o monte está preparau, pa un inzendio tarde en cuando por aber-lo albandonau.



Maquina acosechadera (cullitadera) en Arguis.

No tiene a culpa denguno de que todo ixo pase, ta debán toz nos miramos y o progreso nos lo traye.

Otra cosa que albierto por o que puede suzeder, mellor si no lleba mistos pues no se puede enzender.

Cartels de no fer fuego, cartels de no asar carne, cartels de coto de caza, pero os montes todos arden.

Ya me paize que lo he dicho: antes faltaba taliento, pero agora o que nos sobra son os bizios y os conzietos.

Seguro que toz os montes no se pueden arreglar, sin embargo bellas casas han güelto a resuzitar.

L'umor y a potenzia a muitos se nos ha gastau, agora güelta ta o lugar que s'está más descansau.

Algunos ta a misma casa otros que se l'han comprau, a disfrutar estos años ya dimpués de retirau. Pero agora estos sitios tamién tiengo que contar-les, tienen agua, luz y de todo igual que en as capitales.

Ande minchaban os machos y otras clases de ganau, agora comen as presonas, pa que beigan si ha cambiau.

En hai casas en os lugars les han dau güelta pelera, ande tienen a telebisión antes yera a pesebrera.

N'aquellas eras que trillaban que tamién estaba o pallar, agora son casas y chardins sólo pa ir a beraniar.

En aquellos güertos de casa que teneban un basón, agora hai una piszina con mesas, sillas y un fogón.

Cortaban a yerba de o güerto con a falz y o jadón, agora tienen corta zésped y tamién riego a presión.

Tamién les boi a contar o que pasa en esta bida, a bier si nos damos cuenta porque ye un poco mentira. Aprobeito pa dezir-les, ya que me he puesto a escribir, hai que ser todos amigos mientras nos dejen bibir.

A bida son unos días que nos han queriu regalar, se pasan sin dar-nos cuenta y nos tenemos que marchar.

Nos marchamos d'este mundo sin tener agarradero, aquí lo dejamos todo intereses y dinero.

Por ixo mismo, siñors, se fijen en o que escribo, pa estos días que bibimos hai que ser más comprensibo.

Nos podébanos morir en tener un día u dos, y cada año que nos pasa hai que dar grazias a Dios.

Estamos toz dispuestos y ixo debe de ser mal rato, o que tiene a disgrazia y se muere d'un infarto.

Sin comer-lo ni beber-lo te sale colesterol, adiós pasteles, adiós tozino, adiós a tomar alcol. Tamién tenemos o sida una enfermedá mui gorda, y a pesar de ser tan mala se nos ha puesto de moda.

Ixo de l'azido urico tamién dizen que ye mui malo, o que tiene a disgrazia tratamiento y a aguantar-lo.

Tenemos as depresions que más bale ni pensar, a fartar-se de pastillas y sin ganas de treballar.

Os que salen diabeticos ya ye güena lotería, estar siempre con regimen y endizions cada día.

Os güesos de as caderas tamién nos suelen fallar, algunos lleban tornillos y otros no pueden andar.

Ixo que llaman artrosis son os güesos desgastaus, a columna estropiada y imos de medio lau.

A enfermedá de o cánzer ya ye güena pedregada, con o que emos prosperau y no se puede fer nada. O bingo y as maquinetas una enfermedá biziosa, como imos tan sobraus ya no faltaba otra cosa.

Si a maquina da premio imbitan a o que está alau, pero si no sale cosa no dizen o qu'han gastau.

Luego están as loterías y a o que sía afizionau, y quiera coger o premio ya le digo que ba dau.

Al gubierno sí les toca, tienen o premio seguro, luego reparten un poco; ye pa contentar alguno.

No digo que no arriesgue a este chuego tan afamau, pero no empeñar-se en conseguir o que no está destinau.

Pa chugar a lotería de casa no hai que salir, muitas bezes ya tenemos bastante pa ser feliz.

No hai que ser angluziosos y saber-se aconortar, l'angluzia rompe o saco, pues lo dize o refrán. Nos tenemos que dar cuenta d'estas formas de bibir, dar-nos más bezes a mano y en a calle sonreír.

A os que tienen salú y o dinero con crezes, les digo enorabuena y que lean esto dos bezes.

Todas estas enfermedades que oi en día contamos denguno las conozeba ferá unos cuarenta años.

Antes comebas un güego frito, duro u esclafau, pan untau con azeite y denguno estaba preocupau.

A gallina que poneba o güego minchaba por o corral, cucarachos, trigo u yerba, todo yera natural.

O azeite yera d'oliba porque otro no esistiba, o que da a naturaleza no te ferá mal dengún día.

Desde fa unos trenta años o que ha quiesto treballar tiene más de o que esperaba, no nos podemos quejar. Os fillos que emos teniu que agora ya s'han criau, han teniu sus conzietos y alguno asta demasiau.

Si les das todo o que quieren no lo saben apreziar, cogen un chuguete bueno y ya lo quieren desarmar.

Antes pa tener chuguetes aquellos críos pequeños, pilotas, ruedas u moñas las teneban que fer ellos.

Agora ya bienen os nietos, d'estos no sé qué dezir, si lo tienen todo feito u tendrán que discurrir.

Cuando ban a nazer os críos ya los esperan con coche, pa sacar-los de paseo y cuna pa dormir de noche.

Bella bez os agüelos los sacan a pasear, y cuando ban a o colegio tamién los salen a esperar.

S'entretienen con os nietos porque ya están retiraus, al paso ellos se distraen y no están tanto paraus. Les perdonan todo a os críos, anque faigan o que faigan, y si quieren bella cosa si puede o biello le'n paga.

Amás lo fan contentos y pagan sin tartir, dimpués de todo o qu'han feito aún han sabiu salir.

Agora algunos se lo gastan antes de aber-lo ganau, si bel biello dize algo le dizen que ye retrasau.

Asina ye como está a bida; os biellos no cambiarán, si os chóbens no fan caso ellos ya s'arreglarán.

Con o sida y os atracos y trampas qu'hai por o mundo, tienen faina pa arreglar-lo y l'Estau más que denguno.

Si nos miramos tazaga tenemos mui güen ejemplo, no me canso de dezir que aprobechaban o tiempo.

Agora bienga bacazions y tarde en cuando bel puen, sabado y domingo fiesta, asina treballa a chen. Con o cuento d'estar flacos tienen menuda manía, treballando como dinantes ixo tampoco esistiba.

A muller qu'está morena, mui maja y mui popular; antes a que se tostaba, por pobre y por treballar.

Se tapaban bien os brazos cuando iban a dar gabillas, o sombrero, un pañuelo y medias asta as rodillas.

Dizen que son modas majas sólo porque han cambiau, o blanco agora ye negro y o berde ye colorau.

Dios me deje as modas d'antes pa bella cosa en a bida; con o tiempo güelbe o mismo conque mira qué salida.

Estas modas qu'han beniu que oi lleban as mulleres faldas cortas, faldas largas y o pantalón roto aldredes.

Tamién lleban bel bestiu que paize que ye natural, pero con unas rajas largas pa que entre l'aire al andar. Luego lleban otras faldas pequeñetas y mui chustas, paize que penan pa andar pero ixas a yo me gustan.

A muller qu'estaba gorda antes sí que presumiba, porque teneba pa perder y pa todo o que saliba.

Aquellas canastas y cantaros qu'a muller llebaba enzima, si las tenesen que llebar oi Dios mío, Virgen Santísma.

Pues mia l'asunto d'o secso, qué manera d'esplicar n'as clases, n'a telebisión, pa no dejar-lo ranziar.

Propaganda d'ixas cosas, programas dale que dale, con o qu'hai oi en a farmazia yo creigo que ya les bale.

No tienen qu'enseñar tanto, os chóbens son mui majos, fa falta más respeto y que tiengan más treballos.

A chobentú que hai agora no ye como qu'antes abeba, iban más bezes ta misa pero igual s'entreteneba. Aunque seiga San Lorenzo u Nabidá u San Martín, fan a bida un poco apaizida a o chabalín.

Te debantas de mañanas y se notan as andadas, bel coche sin arradio u con as ruedas punchadas.

D'aquellos bailes d'antes ya no'n queda miaja; cuasi da un poco de pena con o bien que se pasaba.

A las tres de a mañana aún está a cama bazía, algunos güelben ta casa allá cuando biene o día.

Normalmente ye o sabado cuando fan esta salida, y o domingo pa dormir asta más de mediodía.

Bel biello les carraña por o tarde que han beniu, sin parar-se a pensar qu'él tamién yera apaiziu.

Dimpués de toda a juerga o que hai que distinguir, que antes iban a enganchar y agora ban a dormir. A chobentú ye nezesaria, agora y siempre en ha abiu, si no ye por a chen choben sería más aburriu.

Esto lo trayen os tiempos unos se'n ban y otros bienen, agora está de cada uno en bier o que le combiene.

De os bares no digo cosa, si cobran u dejan de cobrar, ellos tienen a puerta abierta pero no obligan a dentrar.

As zagalas d'agora fuman y beben tamién, ha llegau a igualdá, a ellas les paize mui bien.

O diborzio está de moda y partir con a muller, porque cada uno en casa ya en tiene pro que fer.

Se dibierten d'esta manera y aún fan bella cosa más, cuando marchan por o monte beluno no'n güelbe más.

Agora fan as nabatas, mal empleau o treballo, una barcota y dos remos y se arriesgan río abaxo.



Lambique pa fer anís.

Periglan con ixas barcas, tamién fan parapente, a otris les gusta escalar y belunos baxan de frente.

Ir por os montes a ziegas por os barrancos pendientes, si lo pensasen mellor abría menos azidentes.

Si escuchasen a su madre denguno se perdería, porque no ye gusto d'ella que fagan ixa salida.

Luego está o motocrós que marchan por os tozals, beluno tamién s'estoza, mal empleaus os zagals.

Indo por enzima l'agua a muita chen beirás, no sé cómo no s'afunden u les pasa algo más.

O deporte de a niebe ye un deporte muito caro, o que uno pierde otro lo gana esto imos a dexar-lo.

Todas estas distrazions son un poco periglosas, tamién tenemos o puenting por si querébaz más cosas. Asina ye a chubentú, no se puede creticar, si os biellos fuesen chóbens tamién ferían igual.

A bida nos cambea as cosas nos parezca bien u mal, con o tiempo llega todo, ixo sí que ye cheneral.

Os deportes, os conzietos, o tener y no tener, o destino de cada uno no se le suele perder.

De todas formas, siñors, lo boi a dar por terminau, no m'alcuerdo de más cosas, espero les aiga gustau.

Dedico o mío umilde libro a todos en cheneral, porque nunca m'ha gustau quedar con denguno mal.

## L'ARRANQUE

Boi a contar-les de Uesca d'aquellos tiempos pasaus bellas cosetas mui majas que tamién s'han terminau.

Por ejemplo, d'una feria que soleban zelebrar a l'otro día de Pascua n'a Plaza Unidá Nazional.

Este día y ta esta plaza os de os lugars llegaban pa comprar y bender cosas qu'ellos mismos empleaban.

Os mangos d'aquellas jadas y jadones que empleaban los trayeban pa bender y o que quereba compraba.

Ande se criaba esparto tamién sabeban fer esportons y albardas que trayeban pa bender. As escobas de a era en a montaña las feban y pa sacar bel dinero tamién aquí las bendeban.

Otros trayeban estacas pa o chugo de labrar porque tamién se rompeban cuando os machos iban mal.

Abeba muitos benzellos que d'esparto los feban, más bien en a tierra baxa, y que tamién los bendeban.

D'a montaña, d'a tierra baxa y d'o Semontano tamién se chuntaban este día y toz lo pasaban bien.

Esta feria duraba un día; en abeba otra con más chen esta yera pa San Andrés y se lo pasaban bien.

A feria de San Andrés yera de caballerías beniban de toda a probinzia duraba zinco u seis días.

A capital se llenaba de personal y ganau pa todos abeba sitio lo teneban preparau. Dende Benabarre asta Berdún y dende Benasque asta Fraga se chuntaban estos días en a Plaza Santa Clara.

No cogeban en a plaza de tanto jaleo que i eba y en a calle San Lorenzo y Padre Huesca se poneban.

Asta l'altura de a Zona llegaban por cada lau y tamién dentro d'as cuadras abeba muito ganau.

Pa tratar n'aquellas ferias caleba ir espabilau porque a la más menima igual salibas timau.

Si uno tiene un macho malo, u mula u caballo u burro, hai que sacar-lo de casa, ixo tien-lo por seguro.

Os chitanos yeran listos, les gustaba de tratar, feban d'intermediarios y se ganaban o chornal.

Abeba tratantes ricos, teneban muito ganau, d'ixo bebiban to'l año, estaban bien preparaus. Un lechal pa recriar-lo un trenteno pa amansar tamién animales biellos, o que querebas comprar.

Machos chóbens y grandes que yeran de güen amansar, muitos yeran pa maderistas pa treballar n'o pinar.

Toz aquellos maderistas lo teneban un poco mal, sólo en caballerías se les iba un capital.

Machos de muitos billetes y con a bida que llebaban anque quieras u no quieras alguno se'n desgraziaba.

Ya no tenemos ferial, ya no esisten os tratantes, pues todo nos ha cambiau, ya no hai cosa como antes.

Yera a feria de tozinos o lunes de cada semana y en a plaza d'o Chustizia se bendeban y se compraban.

Os que bebiban d'esto los llamaban gorrineros y abeba una costumbre, que no compraban os primeros. Al descargar os tozinos un ombre se presentaba ixe yera un monizipal y que tamién nos cobraba.

Abeba un tiempo a o prinzipio os gorrineros no compraban y asina os de os lugars ellos solos s'apañaban.

Al comprar os gorrineros ya no s'estaba tan bien, compraban por zincuenta duros y los bendeban por zien.

Sin embargo bella bez tamién nos faborezeban porque algunos casaleros tampoco s'entendeban.

Llamábanos casaleros a chen particular que beniban con os tozinos de uno y otro lugar.

Al comprar y no bender-los en a cuadra los meteban y a semana siguiente a mejor s'encarezeban.

Mientras estaban de trato abeba qu'espabilar, dimpués a comprar más cosas y güelta ta casa a zenar. A mejor zenaban tarde, depende d'os kilometros, a las doze a noche u más, que llegaban medio muertos.

Pa que ta faigas una idea d'o día que se llebaba, cuando marchaban ta Uesca todo o que se treballaba.

Si abeba poca distanzia ir ta Uesca no iba mal pero si estaba lejos yera un día criminal.

O día d'emprender biaje, a o final boi a contar-les: abeba que coger o carro y enganchar os animales.

A las tres de a mañana se teneban que debantar pa fer o que he dicho antes y más que boi a contar.

Se feban o biaje en o día, lo pasases bien u mal, porque si feban noche se chugaban o chornal.

Antes que compraban todo tamién teneban que andar bel par de quilometros por dentro de a capital. Si caleba comprar pulpa enta a tienda de Callén, zerca d'a plaza os tozinos, y te serbiba mui bien.

Si quereban bender güegos igual en compraba Callén y si querebas panizo en bendeba él tamién.

Dende a tienda de Callén saliban a paso listo, iban a comprar espezias ta alau qu'estaba Ebaristo.

Si t'encargaban pastillas pa curar bel catarro, dexaban a zesta en o suelo y entraban ta farmazia Marro.

En a tienda de Solanas que tamién estaba a lau se compraba pa comer y tozino blanco salau.

Si nezesitaban cañimo u ramal pa as caballerías, tamién en Santo Domingo u si no en a Correría.

Pa poder blanquiar a casa cuando ya estaba mal en a calle San Martín n'un patio bendeban cal. O que teneba una piel y la quereba bender siempre la compraba Buera, y si no Buera, Reiné.

Cuando no teneban pez pa echar-le marca a o ganau, iban ta o botero Ubieto y te la bendeban escapau.

Tamién por a Confianza pasaba muito a chen porque o señor Sanvicente siempre te trataba bien.

Tamién bendeban boticos y dejar-los pa encubar; o que en nezesitaba muito t'allí los iba a buscar.

Ta casa de o Agricultor a comprar a forca pallera y tamién piedras de sal pa echar-las n'a pesebrera.

Se echaban n'a pesebrera y o macho las laminaba, les desinfestaba a boca, que o salitre les gustaba.

Si querebas zebollino u algo más pa plantar en a güerta de Pisón lo solébanos comprar. Se compraba en estas tiendas de toda esta redolada, sólo por ganar tiempo qu'están zerca d'a posada.

Yera a posada La Viña que iban muitos a parar con o carro y con os bichos que beniban d'o lugar.

Y tamién ta otra posada estaba un poco más ta entro en a calle Ballesteros, yera a posada d'o Centro.

Teneban palla pa os bichos, que en podebas gastar y cobraban ocho pezetas cuando ibas a marchar.

Lo llamaban Zebadero a o que i eba pa cobrar; siempre aduyaba bel poco y estaba pa bijilar.

Se pagaba ocho pezetas de dos machos y en o día, otro prezio fiendo noche y con más caballerías.

Cuando llegabas ta Uesca o que alcontrabas primero entrases por ande entrases a caseta de o Portalero... O Portalero yera un ombre empleau de l'ayuntamiento y cobraba de bellas cosas antes de entrar-las ta entro.

Si llebabas sacos con algo y entremedio bel bicho, subiba o guardia ta o carro y a pagar o que s'ha dicho.

Por entrar bino u patatas abeba que pagar dineros, por pollos, conejos, patos, por güegos y por corderos.

Ibas por quinze pezetas y ya te'n joibaban tres, como beyen ixo ye de siempre, antes, agora y dimpués.

Mientras se bendeba u compraba, que iban de un lau ta otro, os machos en a posada pues comeban poco a poco.

L'ombre que llebaba os machos comeba lo d'a ziambrera, asentau dentro d'o carro y ya por a carretera.

Bellas bezes a l'año se quedaba en Uesca solo, que comeba en La Española, en o Ricocú u o Jacobo. Seguntes qué cosas compraban u yeran de tamaño gran, abeba que coger o carro y por o Coso ta debán.

L'ombre en as arriendas y a muller en a maquina, l'aspeuto que oi farían éste ya se imagina.

L'ombre con pocos estudios y con poca comprensión, aún churaba y gritaba: apreta más Aszensión.

Bella muller llebaba una zestota en o lau con güegos u un pollo drento pa bender-lo en o mercau.


Como llebaban a zesta no podeban llebar bolso y con alpargatas de goma güena marcha por o Coso.

Asina yera a bida d'antes, anque les paizca mentira; abeba mui pocos autos y sin direzión proibida.

Ya s'acaboron os carros, ya no fa falta posadas, agora sólo se bei autos y además a animaladas. O coche ye una maquina y además mui periglosa, porque a la más minima te puedes quedar sin cosa.

Te puedes quedar sin auto y a mejor perder tu bida, dimpués d'o que t'ha costau, y a esto güena salida.

Ya que estoi escribindo aprobecho a ocasión, corre poco con o coche y mete muita atenzión.



O lugar d'Arguis d'agora.

## Endize

Introduzión	
	150

## PUBLICAZIONS D'O CONSELLO D'A FABLA ARAGONESA

1

## "SERIE CHENERAL EN ARAGONÉS"

[Obras orichinals en aragonés, de creyazión literaria en cheneral, icluyindo-bi bolúmens coleutibos de premios literarios]

- 1. José GRACIA: Poemas.
- 2. Cleto TORRODELLAS: Versos y romances en ribagorzano. [Bi ha nueba edizión enamplata: beyer o lumero 33].
- 3. Ana ABARCA DE BOLEA: Obra en aragonés.
- 4. Nieus Luzía DUESO LASCORZ: Al canto'l Zinqueta.
- 5. Inazio ALMUDÉBAR: Beyendo chirar o sol.
- 6. Eduardo VICENTE DE VERA: Chardín d'ausenzias.
- Chuana COSCUJUELA: A Lueca. A istoria d'una mozeta d'o Semontano. 1.ª edizión, 1982 [edizión acotolata].
- BARIOS AUTORS: Primer Premio Literario "Val d'Echo"" (1982).
- 9. Chusé María GUARIDO UBIERGO: A nuestra canta.
- 10. Miguel SANTOLARIA: Mal d'amors.
- 11. BARIOS AUTORS: Segundo Premio Literario "Val d'Echo" (1983).
- 12. Bienvenido MASCARAY SIN: Benas, trallo y fuellas.
- BARIOS AUTORS: Terzer Premio Literario "Val d'Echo" (1984).

- 14. Francho NAGORE LAÍN: Purnas en a zenisa.
- 15. Chusé María FERRER FANTOBA: Ta las fuens me'n boi.
- 16. BARIOS AUTORS: Premio Literario "Guayén" (1983-84).
- 17. Nieus Luzía DUESO LASCORZ: Leyendas de l'Alto Aragón. [1.ª edizión acotolata].
- 18. Chusé Inazio NAVARRO: O mirallo de chelo.
- 19. Ánchel CONTE: No deixez morir a mía boz.
- 20. Victoria NICOLÁS: Plebia grisa.
- 21. BARIOS AUTORS: Cuarto Premio Literario "Val d'Echo" (1986).
- **22. Santiago ROMÁN LEDO:** Rolde de broxas en Crenchafosca y No cal que te'n baigas.
- 23. I CONGRESO TA RA NORMALIZAZIÓN DE L'ARAGONÉS: Propuestas de normas graficas.
- 24. Miguel SANTOLARIA: As charradas de Tonón.
- 25. BARIOS AUTORS: Premio Literario "Guayén" (1985-86).
- 26. I CONGRESO TA RA NORMALIZAZIÓN DE L'ARAGONÉS: Normas graficas de l'aragonés. [1987].
- 27. Rafael SOLANA / Ángel SUBIRÁ: Teyatro en aragonés benasqués: La Roqueta/Pequeño teatro.
- 28. Mª José SUBIRÁ y os ninos de a Escuela de Bilanoba: La tornada de Diana.
- 29. BARIOS AUTORS: Primer premio literario "Bal de Xalón" (1987).
- 30. Miguel SANTOLARIA: L'erenzio.
- 31. Chuana COSCUJUELA: A lueca. [2ª edizión].
- 32. Chusé Raúl USÓN: *Ixe buxo biello (entre fierros).* [Edizión acotolata].
- 33. Cleto TORRODELLAS: Versos y romances en ribagorzano. 2ª edizión enamplata.
- 34. Chesús SALCEDO FERRA: *A peña de a zamueca*. [Falordieta debuxata].
- **35. Chuaquín BORRUEL BUIL:** Con xucamorros y forqueta. Bellas cosetas de gastronomía aragonesa.
- 36. BARIOS AUTORS: Primer Premio Literario en Aragonés "Lo Grau".
- 37. Chusé Inazio NAVARRO: Astí en do l'aire sofla ta sobater as fuellas de os árbols.

- 38. Pablo RECIO: *Horas sueltas*. [Obras completas de Cleto José Torrodellas Mur, Estadilla, 1914-1988].
- 39. Santiago MONCAYOLA y os mozez de a Escuela Publica d'Ansó: Recuerdos de l'onso Chorche. [Edizión acotolata].
- 40. Chabier TOMÁS ARIAS y os ninos de o Curso d'aragonés de Lo Grau: Leyendas de Lo Grau.
- 41. Loís CAVERO, Ascensión PARDOS y os ninos de a escuela de Chistén: Falorietas de Chistén.
- **42.** Chesús Lorién GIMENO y Asunción VALLÉS: Jara (u cómo yeran as escuelas de os nuestros yayos).
- 43. Chuana COSCUJUELA: Continazión (1922-1983).
- 44. Carmen CASTÁN, Antonio PÉREZ LARRIPA y Gonzalo ORNA: Il Premio Literario en Aragonés "Lo Grau".
- **45. BARIOS AUTORS:** Premio Literario "Guayén" (1987-88-89 y 90).
- 46. Chusé Carlos LAÍNEZ: Aires de liloileras (Peruigilium Veneris).
- 47. CENTRO DE RECURSOS "RÍO ARAGÓN": Bellas falordias d'o Biello Aragón / Algunas historias del Viejo Aragón.
- 48. Chuan Chusé BIELSA ALQUÉZAR, Fernando VALLÉS CALVO y belotris: O manantial de Sietemo I (1991).
- Ana Cristina VICÉN y Santiago MONCAYOLA: Animals, animals.
- 50. Mª José SUBIRÁ y os ninos de a Escuela de Billanoba: *La selba encantada*.
- Andrés CASTRO, José Miguel LÓPEZ y Guillermo CAMALLONGA: Il Premio "Tenazeta de fierro". [Cuatrons de moñacos debuxatos].
- 52. Chesús L. GIMENO VALLÉS: A rechira de Chil.
- 53. Chuan Chusé BIELSA, Chuaquín BORRUEL, Chusé Inazio NAVARRO y Rafel VIDALLER: O manantial de Sietemo II (1993).
- 54. Javier LACASTA, José Manuel TERCERO y Fernando URGELÉS: III Premio "Tenazeta de fierro". [Cuatrons de moñacos con debuxos].
- 55. Chusé Carlos LAÍNEZ: A besita de l'ánchel.
- 56. Roberto CORTÉS: Escais d'un zarpau d'intes.
- 57. Zésar BIEC ARBUÉS: Bel puesto en a pantalla.

- Rafel BARRIO, Manuel SANCHEZ, Loís Chabier TEJADA: O manantial de Sietemo III (1995).
- 59. Loís HORTAS, Carlos ENRÍQUEZ, Roberto L'HOTELLERIE, Andrés CASTRO, Santiago COBO y Guillermo CAMALLONGA: IV Premio "Tenazeta de fierro".
- 60. Ana TENA PUY: Ta one im.
- 61. Mª José SUBIRÁ y os ninos de a Escuela de Billanoba: La singardalla sabia / A sangardana sabia.
- 62. Chusé Inazio NABARRO, Ana TENA PUY, Chabier TOMÁS ARIAS: O manantial de Sietemo IV (1997).
- 63. Lorenzo CEBOLLERO CIPRÉS: As cosas d'os tiempos d'antes más en Arguis y a redolada.
- 64. Ana TENA PUY: Bardo que alenta.
- 65. Chusé Carlos LAÍNEZ: Bel diya.
- 66. Carmen CASTÁN, Chuan Carlos MARCO, Ana TENA y Chabier TOMÁS: Premio literario en aragonés «Lo Grau»: III (1992) y IV (1997).
- 67. Mara ALLUÉ, Silbestre BARA, Fernando CAMPO, María FONZILLAS, Carmen GÁLLEGO y Mª Pilar NADAL: O millor estiu. Ilustrazions de Mara Allué.
- 68. Roberto CORTÉS, Ana TENA, Chabier TOMÁS, Alberto BOLSA, Baudilio COLOMINA: V Premio literario en aragonés "Lo Grau" (1998).
- 69. Roberto CORTÉS, Elena CHAZAL, Toni COLLADA, Chabier TOMÁS, ezetra: O manantial de Sietemo V (1999).
- 70. Ana TENA PUY: Cuentos pa biladas sin suenio.
- 71. Nieus Luzía DUESO LASCORZ: La fuen de la Siñora.
- 72. Roberto CORTÉS, Chabier TOMÁS, Antón Ch. GIL, ezetra: VI Premio Literario en Aragonés "Lo Grau" (2000).
- 73. Chuan Carlos BUENO, Antón Lleonardo COLLADA, Elena CHAZAL, ezetra: O manantial de Sietemo VI (2001).
- **74.** Mariano JAVIERRE: *A bal de Tena* [Cuatrons de moñacos con debuxos].
- 75. Roberto CORTÉS: Réquiem por nusatros.
- 76. Carmina PARAÍSO, Elena CHAZAL, Ch. R. USÓN, Óscar LATAS, Chuan Carlos BUENO, Chabier TOMÁS: O manantial de Sietemo VII (2003). Uesca, 2005.
- 77. Chuan Carlos BUENO, Elena CHAZAL, Chusé Antón

- SANTAMARÍA, Sergio MUR e Óscar LATAS: VII e VIII Premios literarios en Aragonés "Lo Grau" (2002 e 2004). Uesca, 2005.
- 78. Carmina PARAÍSO e Ana TENA: O manantial de Sietemo VIII (2005).
- 79. Ana GIMÉNEZ BETRÁN: Palestra.
- 80. Ana TENA PUY: Como minglanas.
- 81. Fabián CASTILLO SEAS: Traquitos de bida e muerte.
- 82. Chesús DE MOSTOLAY: Como as falzillas.
- 83. María Pilar BENÍTEZ MARCO e Carmina PARAÍSO SANTOLARIA: O manantial de Sietemo IX (2007).
- 84. Lorenzo CEBOLLERO CIPRÉS: A bida en a montaña.

#### 2

# "PUENS ENTA RA PAROLA" [Colezión de bocabularios, dizionarios e glosarios]

- **2.1. BLANCAS, Geronimo de**: *Indice donde se declaran algunos vocablos Aragoneses...* (1641). (Edizión facsímil de a primera replega de bocables aragoneses, feita en 1583 y publicata en 1641). Uesca, 1990. 12 pl.
- VICÉN, Ana Cristina y MONCAYOLA, Santiago: Bocabulario de l'ansotano. Uesca, 1991. 86 pl. [Edizión acotolata].
- 2.3. FERNÁNDEZ CÁNCER, Arturo: Bocabulario d'Alloza (Baxo Aragón), con os suyos modismos más usuals. Uesca, 1992. 8 pl.
- 2.4. ESCUDERO BUIL, Pedro José: Léxico aragonés de Monflorite. Uesca, 1995. ISBN: 84-86036. 114 pl.
- 2.5. RODÉS ORQUÍN, Francho: Bocabulario aragonés d'o botero Pedro Lafuente. Uesca, 1996. ISBN: 84-86036-56-9. 85 pl.
- 2.6. ARIZÓN, Inazio, PLATEUW, Marteen, RODÉS, Francho, VALLÉS, Fernando, VIDALLER, Rafel: Bocabulario aragonés d'abes d'Uropa. Uesca, 1996. ISBN: 84-86036-60-7. 233 pl.
- 2.7. MARTÍNEZ RUIZ, Antonio: Vocabulario básico bilingüe aragonés-castellano y castellano-aragonés. Uesca, 1997. 2ª edizión correchita y enamplata, Uesca, 2002. ISBN:

84-95997-02-9.631 pl.

2.8. RÍOS NASARRE, Paz: Bocabulario d'o Semontano de Balbastro (de Salas Altas y a redolada). Uesca, 1997. ISBN: 84-86036-63-1. 170 pl.

2.9. ROMANOS, Fernando/SÁNCHEZ, Fernando: L'aragonés de A Fueba: bocabulario y notas gramaticals. Uesca, 1999.

ISBN: 84-86036-68-2. 166 pl.

2.10. ARIÑO CASTEL, José María: La Bal de Lierp. Geografía y léxico. Uesca, 1999. ISBN: 84-86036-82-8. 96 pl.

- 2.11. LÓPEZ SUSÍN, José Ignacio / MONTANER SUSÍN, María Dolores: Bocabulario de Plasenzia (Sotonera). Uesca, 2000. ISBN: 84-86036-84-4. 150 pl.
- 2.12. CASTILLO SEAS, Fabián: Bocabulario de l'aragonés d'Alquezra y lugars d'a redolada. Uesca, 2001. ISBN: 84-86036-94-1. 256 pl.
- 2.13. GARCÉS, Agliberto: Fraseología de habla popular aragonesa. Uesca, 2002. ISBN: 84-95997-03-7. 367 pl.
- **2.14. SOLER BETÉS, Amparo-Ángeles:** Replega de bocabulario de Ballobar. Uesca, 2004. ISBN: 84-95997-12-6. 192 pl.
- 2.15. RODES, Francho, MAZA, Paquita, GAVÍN, Gonzalo: Bocabulario monegrino. Uesca, 2005. 140 pl.
- 2.16. EITO, Antón: El aragonés de Embún. Uesca, 2006. 192 pl.
- 2.17. BLAS Y UBIDE, Juan: Modismos dialectales de Calatayud (1877). [Edizión facsimilar]. Introduzión de Óscar Latas Alegre. Uesca, 2007. 58 pl.

3

# "A TEFLA DE CUATRO FUELLAS" [Ensayos, estudios, rechiras e obras d'espardidura]

- 3.1. ALMUDÉBAR, Inazio: Claroscuros. Uesca, 1980.
- 3.2. NAGORE, Francho y GIMENO, Chesús L.: El aragonés hoy. Informe sobre la situación actual de la lengua aragonesa. Uesca, 1989. [Edizión acotolata].
- 3.3. CRESPO, Ángel: La nueva poesía en aragonés. Ensayos y críticas. Uesca, 1997.
- 3.4. BAQUÉ, Amalia, y MAINER, Mª Amalia: Rezetas familiars

- aragonesas / Recetas familiares aragonesas. [1ª edizión, 2000, acotolata; 2ª edizión en paranza].
- 3.5. RÍOS NASARRE, Paz, e BOLSA PUYUELO, Alberto: Replega de tradizión oral en Salas Altas. Uesca, 2003.
- 3.6. LATAS, Óscar, e NAGORE, Francho (replegadors y editors): Foratata. Antolochía de testos en aragonés de l'Alto Galligo. Uesca, 2007.

#### 4

### "A TUCA"

[Creyazión literaria: obras de os millors autors, testos clasicos e testimonials]

- 4.1. CONTE, Ánchel: O tiempo y os días. Uesca, 1996.
- **4.2.** NABARRO, Chusé Inazio: En esfensa de as tabiernas y atros poemas. Uesca, 1998.
- 4.3. CONTE, Ánchel: E zaga o mar o desierto. Uesca, 2002.
- **4.4. NABARRO, Chusé Inazio:** Sonetos d'amor e guambra. Uesca, 2001.
- 4.5. DUESO, Nieus Luzía: Leyendas de l'Alto Aragón. Uesca, 2003.
- 4.6. PALACIO ALLUÉ, Máximo: Traquitos de Biescas. Uesca, 2004.
- 4.7. DUESO, Nieus Luzía: Dios m'en guarde! Uesca, 2007.
- **4.8. COLLADA, Antón:** ¿Per qué plloran las estrelas? Uesca, 2009.

# 5 "OS FUSTEZ"

## [Traduzions]

- 5.1. CRESPO, Ángel: Triga breu (1949-1995). Introduzión, triga y traduzión en aragonés feitas por Francho Nagore Laín. Uesca, 1996.
- 5.2. VALÉRY, Paul: O fosal marino. Traduzión en aragonés feita por Francho Nagore. Uesca, 1998.
- 5.3. Cullita d'otri (antoloxía de Poesía Contemporania Ozidental).

- Poemas de 17 poetas en diferens fablas; introduzión, triga e traduzión de Chusé Raúl Usón.
- 5.4. Branquil d'a Cerdanya. Relatos d'o Pirineo. Relatos de 15 autors (8 en aragonés e 7 en catalán). Traduzión d'os testos en catalán ta l'aragonés por Chusé Inazio Navarro. Uesca, 2007.
- 5.5. Capiscol. Relatos d'a Bal de Tena. Uesca, 2008.

## 6 "CHARRÍN-CHARRÁN"

[Libros escolars e d'amostranza]

- 6.1. CONSELLO D'A FABLA ARAGONESA ZENTRO DE PROFESORS Y DE RECURSOS DE SAMIANIGO: Lizions de fabla aragonesa. Uesca, 1997; 2ª edizión, 1998.
- **6.2.** SANTAMARÍA, Chusé Antón: Chugar e charrar. Materials de refirme ta ra creyatibidá en Luenga Aragonesa. Uesca, 2003.

## 7 "O GUA"

## [Literatura infantil e chobenil]

- 7.1. MONCAYOLA, Santiago, y VICÉN, Ana Cristina: No son indios toz os que fan a tana. Uesca, 2000. ISBN: 8486036-80-1. 87 pl.
- **7.2. BIEC, Zésar, e LAGUARTA, Cristina:** *Abenta-las ta ra mar.* Uesca, 2001. ISBN: 84-86036-91-7. 18 pl.
- 7.3. OLIVÁN, Pablo, e OSTALÉ, Alejandro: *O furtaire d'estrelas*. Uesca, 2001. ISBN: 84-86036-92-5. 24 pl.
- 7.4. LARROY, Chusé Manuel, LÓPEZ ARRUEBO, Carlos Loís, SORIANO, Chusé Chabier, e ROYO, Tresa Luzía: A broxa. Uesca, 2001. ISBN: 84-86036-93-3. 22 pl.
- 7.5. BARIOS AUTORS: Teyatro infantil en aragonés. Premio "A carracla" (Samianigo). Uesca, 2002. ISBN: 84-95997-05-3. 48 pl.
- **7.6. BARIOS AUTORS:** *As siete crapetas e o lupo.* Teyatro ta leyer e pintar. Uesca, 2002. ISBN: 84-95997-06-1. 60 pl.

- 7.7. BENÍTEZ, Mª Pilar: Chima. Besos royos en o canfranero. Ilustrazions de Maribel Rey. Uesca, 2003. ISBN: 84-95997-10-X. 85 pl.
- 7.8. ESCUELA PUBLICA D'ANSÓ (MONCAYOLA SUELVES, Santiago, coord.): Recuerdos de l'onso Chorche. Uesca, 2006. ISBN: 84-95997-20-7. 60 pl.
- **7.9. BIEC ARBUÉS, Zésar:** *O fuego que nunca no s'amorta.* Uesca, 2009. ISBN: 978-84-95997-32-6. 54 pl.

### **PUBLICAZIONS PERIODICAS**

- Fuellas d'informazión d'o Consello d'a Fabla Aragonesa. Publicazión bimestral d'informazión d'autualidá sobre l'aragonés e a cultura feita en aragonés: literatura, amostranza, publicazions, politica lingüistica, testos populars, autibidaz, rezensions, testos curtos de creyazión literaria, treballos de rechira, replegas de bocabulario, ezetra. Dende 1978.
- Luenga & fablas. Publicazión añal de rechiras, treballos e decumentazión arredol de l'aragonés e a suya literatura. Dende 1997.

# INFORMAZIÓN

www.consello.org

#### Demandas:

PUBLICAZIONS D'O CONSELLO D'A FABLA ARAGONESA.

Trestallo postal 147. E-22080 UESCA.

[Abenida d'os Danzantes de Uesca, 34, baxo. E-22005 Uesca (Aragón). Telefono e facs: 974-231513. Adreza eleutronica: cfa@ consello.org].

### Distribuzión:

Ícaro Distribuidora Ctra. de Valencia, km. 14,500 Poligono El Plano, nau 39 50430 MARÍA DE HUERVA (Zaragoza) Telefono 976-126333

Facs: 976-126493

I.S.B.N.: 84-86036-70-4 SEDIE CHENEDAL EN A

SERIE CHENERAL EN ARAGONÉS PUBLICAZIÓN LUMERO 63

Lorenzo Cebollero Ciprés naxió en Arguis en 1932, en do bibió dica os 32 años. I fue ta ra escuela, anque sólo dica os 13 años; dimpués s'adedicó a os quefers d'o campo, tanto agricolas como ganaders. Yera o mayor de seis chirmans, por o que li tocó aduyar a ir sacandolos enta adebán. Se'n baxó ta Uesca cuando teneba trentaitrés años. Dimpués de fer un curset de soldadura, estió treballando en o metal. en diferens interpresas, dica ra chubilazión. Contina puyando a ormino ta Arguis, en do mantiene casa ubierta. Ya de retirau, dada ra suya gran fazilidá ta bersificar, fa gran cantidá d'estrofas sobre os quefers, as trazas de bida y os costumbres de cuando vera choben, en o suyo lugar y a redolada. Primero, una bersión curta, de a que fa una tirada a ziclostil que esparde entre a chen de o país; dimpués, contina escribindo y asinas plega a achuntar zerca de mil estrofas en as que pasa rebista a toz os temas: ofizios, modas, lugars, chens, casas, treballos, tradizions, crevenzias, comidas, chuegos, fiestas, ferramientas y artularios, educazión, ricuerdos... Tot ixo, ilustrau con as fotos de Fernando Pérez Malo, que tamién ye d'Arguis y como fotero profesional leba a interpresa "Fotoprisma", ye o libro As cosas d'os tiempos d'antes más en Arguis y a redolada, en o que tamién como no podeba estar d'otra manera - se rescata y se dinifica l'aragonés que l'autor charraba de choben en o lugar, y que contina prauticando en buena mida.

CON L'ADUYA DE:



